



TAPAK 9

Rajnath aser Venkaiah nati Sonia ajuru



TAPAK 10

America nunger temulung meilatsü: Donald Trump

VOL. XIV NO. 239 (ADOK 239)

DIMAPUR

SATURDAY

JUNE 17, 2017

5.00

Nagaland rongsenji teimbaka aluyimba nungi adoker : APC Imkonglemba

Kohima, Jun 16 (TYO) : Nagaland ya aluyimba nungiang rongsen angur, iba jagi state nung rongsen adokba jenjang asadanga Gross Domestic Product (GDP) 30% bo aluyimba nungi arur ta Agriculture Production Commissioner Nagaland aser Commissioner & Secretary, T. Imkonglemba metetdaksü.

Kohima nung aluyimba maparen nung amshiba machine aser osettem ayokba showroom ka tenüng agi 'Pipi Traders' semzüksüba sentong nung jembidang, aluyimertem aliba agiang asenok alir, anungji parnok mapa inyadng amshitsü asoshi technology tasen bener arua yariteptsüba asenok mapa asütsüla ta paisa metetdaksü.

Agriculture department-i aluyimba maparen nung scientists den külemi inyaker, iba jagiang aluyimertem inyakyim tasen bener oa sayudang melamelaa agizüketter ta Imkonglembaisa

metetdaksü.

2009 küm Systematic Rice Intensification sentong ka scientist-temi north eastern region nung tenzük aser ibaji India government-i 2012 küm agizüka mapa küma inyaksü tenzük, iba jagi mapa inyakba nung senotsü ajema endoker aser tsükbo anasü agi timba aror, ta paisa ashi.

Aluyimba maparen nung ya government kijaibo meinyaktetsü, anungji aluyimertem rongnung Pipi entrepreneur nunger ama adoktsüla aser NABARD ama financial institution-temi aluyimertem nem sen aputsütsüla, iba jagi ano rongsen ang tali züintsü ta metetdaksü.

Iba sentong nung India government nungi Joint Secretary, Dr. Tarsem Chand-ia mapang tatsüka agia jembidang, center nung aluyimertem yaritsüsa sentong aika lir, anungji aluyimer aser mapa inyaker temi itemji bushia asüngdangtsüla ta metetdaksü.

Nagaland nung election timi agitsü indang ken o lemtep

Kohima, June 16 (TYO) : Hokolbar nü Hotel Japfu, Kohima nung Chief Electoral Officer-i ayongzükba SVEEP core committee senden ka menogo.

Iba senden nung Nagaland nung aliba yimten telok (political parties), NBCC-i anir arogotem telongjem aser lokti tentet balala nungi lenirtem dena liasü.

Iba senden nung adenertem

Nagaland nung election timi agitsü asoshi Election department-i electoral roll merüktetba nung kanga temulung agüja inyaksüla aser election mapang ketdangser presiding aser polling officer-temi pei mapa shitak aser timi inyaksü atema kanga junga renemtsütsüla ta metetdaksü.

(Maneni tapak 11 nung...)

UNC-i June 18 nü ghonda 12 mokdangtsü

Imphal, June 16 (Agencies): United Naga Council (UNC)-i June 18, 2017 nü Manipur kübok Naga nunger litsü nung ghonda 12 mokdangtsü ayongzükogo.

UNC-i "Indo-Naga peace process" pusema nungitba aser August 3, 2015 nü 'Framework Agreement' agiba tembanga mapa inyaksü takhangba agüja iba mokdang sentong ayongzükter.

Naga nungeri tangar tashi anema pei litsü kümzüka arur. Ajisüaka, tang aliba political system kübok asen litsü, maitsü, putiotsü, sobaliba aser rejutem kümzüka mali. Anungji,

Naga nunger putiotsü aser tensa den apet, yimten tebilemstü atema telemetba ka agitsüla, ta UNC-i sangdong ka nung metetdaksü.

June 18, 2017 anepdang 6:00 ako nungi tenzük mokdangba mapang, tamangba yimsü dak sendakba sentongtem, water supply, electricity, telecom, medical aser media tembo maitdaksür. Pei pei litsü nung Naga nunger kintemi mokdang sentong ketdangtsüa repringtsü tuyur aser mokdang alema inyaker tem merenshitsu, ta UNC sangdong nungsa shia lir.

Kidang mapa inyaker tem akümketa lidaktsütsü indang jembida



June 16, 2017 nü Christ King Church, Jubilee Hall Kohima Village nung 'Regional Conference on Decent Work for domestic workers' sentong agidang MLA Dr T M Lotha aser MLA Dr Nicky Kire na den tangartem külemi agiba noksa ka angur.

Kohima, Jun 16 (TYO) : Kidang mapa inyaker tema alar ama mamshii nisung ama akümketa alitsüsa kanga junga anepalutsüla ta tanü yangi Kohima nung "Regional Conference on Decent Work for domestic workers" omen amendaker mongdang ka liogo.

Iba mongdang nung tangar kidang ki mapa inyaksürtem rongnung Kohima nung alir tetsür ka tenüng agi Usha Devi-i ashiba agi, la nem ita sen 2500 agütsür aser iba jagi ita piyong kibong nungdak meperir, ajisüaka ano ibajia mapang shitak nung magütsür, iba jagi tali timater.

Iba mongdang ya Ferrando Domestic Workers Alliance (FDWA) - Centre for Development Initiative (CDI) telok aser National Domestic Workers Movement - Nagaland (NDWM-N) na longjemer "International Domestic Workers Day" amongba tenüng nung Christ King School jubilee memorial hall nung ayongzük

kaogo.

Usha-isa ashiba agi, anogo shia ki kiburtemi ashiba mapatem kanga meranga inyaker saka taa tera dang agütsür, ibayongji tangar ama akümketa melitetter, anungji government-i ki mapa inyaker asoshia taa tatakzük ka lateta yutsütsüla.

Usha-i jembibaji pusema tangar kidang ki mapa inyaksür, shirnok teküpbok jenjang nung aliba kibongtem nungi lir, parnok ajak tenüng nung iba mongdang ayonger state government dangi ki mapa inyaker tem taküm tia repringdangern parnoki inyakba mapa nungi taa shitak ngua anisüngzüka litettsüsa tapet mapa karbo inyakdaksünern ta tezüluba nung agütsüogo.

Parnokisa tangar kidang ki mapa inyaksür taa telatet ka alitsüla aser parnok asoshi teyari angudak sentonga karbo alitsüla ta metetdaksü.

Kasa telokisa government dang tangar kidang mapa

inyaker tem tia repringa anepalutsü asoshi Welfare Board tajung ka alitsüla aser parnok dang mapa tapu balala inyak sayutsüla ta metetdaksüogo.

Iba kasa sentong nung, Advisor, Labour Employment & Skill Development, aser MLA. Dr T M Lotha-ia mapang tatsüka agia jembidang, India nung tangar kidang mapa inyaker temi meranga inyakba mapatembo ano mereprangteti yua lir ta metetdaksü.

"Linük nung teküpbok tia nung alir aser tashimaitertem asoshi ozüngtem, Unorganized Social Security Act 2008, Sexual Harassment Against Women at Work Place (Prevention, Prohibition and Redressal) Acts 2013 aser Minimum Wages Schedule yanglua lir saka tang tashi tangar kidang ki mapa inyaksür asoshibo teyari angutsüsa kecha ozüng lateta maka," ta Dr.T.M.Lothaisa metetdaksü.

(Maneni tapak 11 nung...)

2018 election nung Congress-i takok angutsü: NPCC

Kohima, June 16 (TYO): Naga People's Front (NPF)-i aniba DAN sorkari Nagaland state nung BJP indaktsür aser iba atema nübortem mepelar, anungji taruba sorkarji Congress-i akümstü, ta tanü Nagaland Pradesh Congress Committee-i metetdaksü.

"NPF-i aniba DAN sorkari BJP indaktsüba ajanga Naga nunger tamangba yimsü aser maitsü nung amokmerener. Iba jagi Naga nungeri parnok dang mepelar" ta tanü nikongdang NPCC tir, K Therie-i osangbenertem den sensaksem dang ashi.

Nagaland nung Congress putu süitemogo ta Chief Minister Dr Shurhodelie Liezietsu-i jembiba olen atema Therie-isa agi, "ibaji karara jembir, kechiyong Nagaland nung BJP'er yimtenren kongsangtem anema nokdakba yimtenren telokji Congress dang lir."

"NPF laotsü mapang atonger,

kechiyong parnok indang vote ji shilem asem küma lemsatsü. NPF, BJP aser tawa tasen tentetba Democratic Peoples' Party (DPP) tsüngda parnok vote bank lemsatsü" ta paisa shisem.

"NPF-i aniba DAN sorkar mapang nisung kar dang takar akümiba, ali aliba aser kiojen yanglubaji Naga nungertem ngua lir. 2018 elections nung Naga nungeri sorkar nung tang teinyakdak pur anema aser BJP anema nokdakba ajanga onok nem vote agütsütsü imlar" ta NPCC tir-isa shisem.

NPF-i aniba DAN sorkari tesüiba küm 10 dak tema sorkar ketdangtsüa arudang, Nagaland tesüleni anir luogo aser asenok den kidanger state tem den medem dangra, terenlok tsütsü asenok talangka pilaa lir, ta paisa shisem.

Taruba state elections nung Nagaland Congress-i NPCC anema tokteptsü indang olen ka

ashidang, Therie-i "political party temi tamendakdak, tangatetba aser alizüngtem yur tenteter. Naga nungeri candidate dang mereprangi party indang onüktem aser parnok teinyaktsütem asadanger ang vote agütsütsüla" ta metetdaksü.

Democracy ka nung nübortem political party-i jembiba onük aser election manifesto nung ajemdaker vote agütsür saka asen state nungbo nübortem party indang tamendakdak merepranger, ta paisa shisem.

Nagaland Chief Minister-i Nagaland Municipal Act 2001 ajunga yanglushitsü ta ashiba olen atema Therie-i NPCC indang January 12 telemetba nenshia metetdaksü.

Nagaland Municipal Act atema tribal telok aser society tem den asüngdangya asütsüla. Act ji meindoktetsü, anungji amendment asütsüla, ta paisa ashi.

(Maneni tapak 12 nung...)



Nü VOTE

Enoktsütetsüsa anguba nüchiso jenjangji Tongtibang temeten ka dangbo masü, Saka nai nü tarutsü tia shimtetba mapa ka lir.

IPR Director-i DPRO Wokha office semdang



June 15, 2017 nü Wokha nung IPR Director, Limawati Longchar den DPRO, Wokha ketdangsertem aser staff külemi agiba noksa angur.

Dimapur, June 16 (TYO): June 15, 2017 nü Information & Public Relations Director, Limawati Longchar-i District Public Relations Office, Wokha semdang.

Iba mapang Limawati Longchar-i DPRO staff den sensaksem dang, department indang maitsüji ketdangsertem aser staff temi mapa inyakba ajanga sayur, ta ashi.

Paisa, staff ajak dang pei nem

lemzüka mapa bendanga agüja inyaksü ayongzüik.

DPRO, Wokha indang office sema senzüba sülen IPR Director-isa, staff tem tetsükdaksü melii mapa inyaka aotsü atema tang nüngdakbatem agütsütsü merangtsü, ta ashi.

DPRO, Wokha Director, N.Stephen Ngullie-i IPR Director pelaa agizükdang, pai district atema aria bilemstüba

atema pelaba olen ka ashi aser pa inyakba kümsük mapang terenlok aika angutsü imlar, ta shisem.

Iba mapang Wokha Deputy Commissioner, Wezope Kenyenia IPR, Director den ajurutepa sensaksem aser indangji department ajungkettsü atema tebilembatem lemsatop.

Iba mapang Registrar, IPR, Nungshiwati-i IPR Director meina aru.

NPF headquarters nung Central Youth Wing senden amen

Dimapur, June 16 (TYO): May 1, 2017 nü Naga Peoples' Front Tir, Dr. Shurhozelie Liezetsu-i Chotisuh Sazo NPF Phek Division & Central Youth Wing in charge shimba sülen Youth Wing den mezüngbuba senden June 15, 2017 nü NPF headquarters nung kaogo.

Iba senden ya Central Youth Wing vice president, Achamo Kikon leniba nung agi, Associate Press Secretary, Neizokhtuo Belho-i sarasadem aser Tir, N. Vihoshe Swu-i lokti pelaa agizük.

Iba senden nung jembidang Minister incharge-i Party putiotsü

aser party-i Naga nung atema inyakba mapatem metetdaksü.

Party tangatetba atangji nung inyaka party tentetba mapang nungi tenzüka party-i India sorkar aser Naga nung tsüingda India-Naga tebilemstü onük atema inyaker. Tensa apir Party-i orentem melenshiaka party-i kodanga omen "fide non armis" aser temaitsü antepong memelenshir. Northeast nung NPF ya Regional Party tejentiba lir aser linük nung regional party tejentiba tanabuba jenjang nung lir.

Minister-isa Central Youth office ketdangpurtem dang Party

junga tenzüksü ayongzüka, "Nenoki meranga inyakba aser nendaka inyakbaji Party-i züngshitsü aser tapet sempet agütsütsü," ta metetdaksü.

Paisa, asür, Vamuzo aser Dr. Shurhozelie nung Nagaland Legislative Assembly züngsem mesüika party-i Chief Minister tem kümdaksü, ta metetdaksü.

Paisa lanur lenirtem dang nüburtem atema tajungtiba agi tenzüksü ayongzüka liasü.

Central Youth Wing working President, Bendangtoshi Longchar-i tepela o jembia iba senden tembang liasü.

Zhadima VDB-i anir Kohima-Bokajan lenmang anepalur



Dimapur, June 16 (TYO): Dimapur na tsüingda gari Village Development Board (VDB) Zhadima village-i Kohima-Bokajan NEC lenmang yanglushidar.

Iba lenmang ajanga Zhadima 10th IRB (NAP) Battalion, Assam Rifles outpost Ziezou, Phekerkriema, Tsosunyu, Ghutovi, Niuland aser Dimapur adener, aser Kohima o Dimapur na tsüingda lenmang tanabubajibo iba ya dang lir.

Küm aika state PWD department-i Kohima o

Dimapur na tsüingda gari lenmang tongti ya senzüka toktsür, ta Zhadima village VDB secretary Roko Angami-i ashi.

Iba jagi yimdaklirtemi iba gari lenmang mapang shia pei senotsü aser nübo endoka anepalutsüsa akümer, ta Roko Angami-isa ashi.

Public atema tongtambang lenmang anepalutsü atema yimdaklirtemi yimer sasep nung sen sarutsü sentong lir, paisa shisem.

Yimdaklirtemi aiben

mepishiaka PWD department-i iba gari lenmang anepalu masür aser iba atema sasa bilemer, ta VDB secretary-isa metetdaksü.

Paisa, bangdak department dang Kohima-Bokajan NEC lenmang tekaritiba nung anepalutsü atema tayongzüka agütsü.

Tang Kohima-Dimapur four lane road mapa inyakba ajanga senzusenbongertem Kohima-Bokajan NEC lenmang ajanga senzüdang kanga timtem ajurur.

PUBLIC MEMORIAL SERVICE IN HONOUR OF INO. S.S. KHAPLANG CHAIRMAN NSCN (K)



Jointly organized by
Eastern Nagaland Peoples' Organisation (ENPO)
& Nagaland Tribes Council (NTC)

17th June 2017 * IMC Hall, Supply Colony, Dimapur * 1:00 P.M

1. Chairperson : Ino. Joshua Newmai
2. Invocation prayer : Ino. W. Chingmak, Pastor
Chang Baptist Church Dimapur
3. Short speeches : a) Ino. Lendinokdang Ao,
President, NTC
b) Ino. Khoiwang Konyak,
President, ENPO
4. Profile/life contribution
of Ino. S.S. Khaplang : Ino. Niketu Iralu
5. A Melancholic Dirge : Ino. Tali Angh
6. Eulogy : a) NNPGs - Working Group
b) CNTC
c) NGB Federation
7. Hymn : My Country, "Tis of Thee"
8. Solemn prayer &
Benediction : Rev. Tenga Seb, President, BPF.D.

- All are cordially invited -

S. Hukavi-i Zunheboto nung Sabka Saath Sabka Vikas Sammelan tenzüksü



Zunheboto nung Sabka Saath Sabka Ka Vikas Saamelan tenzüksü sentong nung Parliamentary Secretary, Hukavi Zhimomi den tanga ketdangsertem agiba noksa ka angur.

Dimapur, June 16 (TYO): June 16, 2017 nü Jails, Science & Technology & NKVIB Parliamentary Secretary, S. Hukavi Zhimomi-i Sabka Saath Sabka Vikas Sammelan tenzüksüügo.

Iba sentong ya Indian Oil Corporation (IOC)-i ayongzüik aser Town Hall, Zunheboto nung agi.

Prime Minister, Narendra Modi-i aniba sorkarji nüboritem ajungketba sorkar ka lir aser küm asem tsüingda terenlok mapa aika inyaktetogo, ta Parliamentary Secretary S. Hukavi-i o jembidang ashi.

Modi'er sorkari demonetisation, Goods & Service Tax, Make in India,

Housing for all ama maparen aser scheme balala ajanga mapa tajung aika inyaktetogo aser ochimashi azüokba den sensakertem atema inyaksür, ta paisa ashi.

Hukavi-isa Nodal Officer, Indian Oil Corporation (IOC), A.K. Sakia dang tarutsü nung Zunheboto nung gas agencies aser petrol stations talila lapoktsü atema mepishia metetdaksü.

Iba sentong nung India sorkari küm asem tsüingda Good governance indang video ka sayua liasü.

Sentong nung BJP Zunheboto district President, Shikuto Achumi-ia o tatsüka jembia aser Nodal Officer, A K Sakia-i anküp tepela o jembia.



Hokolbarnü Guwahati nung Bharatiya Janata Yuva Morcha (BJYM)-i High School leaving Certificate Examination (HSLC), Higher Secondary Examination aser High Madrassa 2017 nung takok angur nem tenüngsang agütsüba sentong nung Assam chief minister Sarbananda Sonowal den State Education minister Himanta Biswa Sarma na adenba noksa nung angur. (Guwahati, June 16)

Meghalaya sorkari Shillong aser Sohra tsüngda train lenmang yangludaktsünür



Shillong, June 16 (Agencies): Meghalaya Chief Minister Mukul Sangma-i railway ketdangsertem dang Shillong aser Sohra tsüngda train agi sendakteptsü atema sentong atongang ta tetuyuba agütsü.

Brihostibarnü Sangma-i Northeast Frontier Railway (NFR) ketdangsertem den senden ka amendang, Shillong-Sohra railway link ajanga state aser nübertem nem maongka aika agütsütsü, ta ashi.

Iba ajanga tourism jenjang ajungkettsü aser aluyimertemi teyari tulu angutsü, ta paisa shisem.

Sohra ya alima nung tzünglu kanga aruba tesem ta züngshir aser Shillong nungi kilometer 50 shi pilar lir.

1895-96 tashi Assam nung British provincial sorkari Cherra (Sohra) Companyganj State Railways yanglu aser iba putu nung mezüngbuba railway project ji iba ya liasü.

Iba train ya Darjeeling Himalayan Railways mesüra "Toy Train" ta ajaba mesüka liasü.

"Nübertemi iba train nung dang sapua amentsü aser Meghalaya maneni semdangnütsü. Apuanitem honeymoon mapang mesüra tanga anogomungtem amungdang iba train nung mener senzünütsü" ta Meghalaya chief minister-isa metetdaktsü.

Khasi-Jaintia Hills tesem nung nübertemi Meghalaya

kübok Byrnihat aser Assam kübok Tetelia tsüngda sendaktepba train lenmang yangluba anema ola adokba mapang ka nung Meghalaya sorkari Shillong-Sohra railway line indang tebilemba metetdaksüogo.

Meghalaya nung Khasi Students' Union (KSU)-i Railways anema nokdaker, kechiyong parnoki ashiba agi, iba ajanga ozüng alema bendangertem state nung arua alitsü.

"Ni railway ketdangsertem dang ozüng alema tangartem aruba nokdangtsü aser melidaktsütsü atema sentongtem yangluang ta hi shiogo" ta Sangma-isa metetdaktsü.

November 30, 2014 nü Prime Minister Narendra Modi-i Garo Hills kübok Mendipathar nung mezüngbuba railway station lapokja liasü.

Kilometer 19.47 railway lenmang ajanga Mendipathar nungi Assam kübok Goalpara district nung Dudhnoi den sendakteptsü.



OFFICE OF THE DIMAPUR AO YOUTH ORGANISATION DIMAPUR : NAGALAND.

Dimapur Ao Lanur Telongjem (DALT) Sanen Luden 2nd May, 2017 mena DALT Temzüng Ocet III Clause 2 nung ajemdaker züngsem züluokba (registration) saru sen ter (Rs.10/-) küm asem 2015-2018 atema Dimapur aser temeket nung alir küm 20-50 tashi sarutsü. Anungji DALT temzüng nung aliba ama na iba telongjem nung züngsem tajung ka asütsü asoshi ner unit office nung nü tenüng den sen Rs. 10/- tekaratiba nung agütsütsü metetdaksür. Iba saru unit office ajanga sarur DALT office nem agüjang ta metetdaksür.

Iba den Dimapur Ao Lanur Telongjem (DALT) kübok entrepreneur committee ka lapoka lir. Iba committee ajanga Dimapur aser temeket nung alir business aser entrepreneur tapu balala inyaker tenüng, pa/la inyakba mapa tejangja bendentsü aser ibaji nungdakba nüpurtem asoshi kaket tajung ka adoktsu renema lir. Aser iba mapaji July 2017 ita tashi nung unit ajanga bendentsü atema query form ka unit office dangi yokogo. Anungji entrepreneur/business mapa balala nung alirtem ajaki tekaratiba nung unit office nem nü tenüng aser unit balala tejangja agütsütsü mepishia metetdaksür.

Unit Tenung	President Tenung	Contact No.
1. Diphupar Ao Lanur Telongjem	Merenjung	8014439229
2. Lungmen Ao Lanur Telongjem	Akummeren	9436831392
3. Aoyimkum Ao Langr Telongjem	Yangikum	8794617578
4. Aoyimti Ao Lanur Telongjem	Lanuba	9612934315
5. Diphupar 'B' Ao Lanur Telongjem	C. Temjen	9862227518
6. Indisen Ao Lanur Telongjem	Tatongba Walling	9856316352
7. Merali Ao Lanur Telongjem	S. Pangertoshi	9436658921
8. Nagarjan Ao Lanur Telongjem	T. Zulu Longkumer	9862129138
9. Duncan Ao Lanur Telongjem	Imlitemsu	9436400637
10. Signal Bosti Ao Lanur Telongjem	Imlisunep	9612854568
11. Mohan Bosti Ao Lanur Telongjem	M.Chuba Ozukum	8731895978
12. East Dimapur Ao Lanur Telongjem	Mayangba	8131078737
13. Aoyimsen Ao Lanur Telongjem	Temsu Ao	9436004934
14. Dimapur Ao Lanur Telongjem	K.Longri Imchen	9402696541

Sd/-
K Longri Imchen
President
9402696541

Sd/-
Meyatoba
Gen. Secretary
9612057957

Army-i khasetba yimdaklir indang mang ayimer: Pema Khandu

Itanagar, June 16 (Agencies): Changlang district nung army-i telungpur ta bilema nisung ka aibelena khasetba atema Arunachal Pradesh chief minister Pema Khandu-i asükhu lemsatepogo.

"Khonsa yimdaklir Thingtu Ngemu (35) khasetba aser ano nisung aika yirutsüba osang ni angazükogo. Jungjunga shisadanga aser sentong atonga inyak asübo, iba ama lendong ta majurula" ta Khandu-i sangdong ka nung metetdaksü.

Arunachal Pradesh chief minister ya tang state adena orr lir aser pai sangdong nung tasür kibong aser yirua alirtem den sasaba olen lemsatep.

Telungpur telok ka nungi züngsemtem senzüsönongba

osang tejangja angazükba sülen, army-i iba tesem tonga oa mit. Ajisüaka, nisung kati temulung malemsü senzüba agi sepaitemi injang khaloktsü aser idangji pa khaset, ta Defence PRO Colonel Chiranjit Konwer-i Brihotisbarnü metetdaksü.

"Iba takoksa atema senotsü agütsüba ajanga taküm meyipa bener marutettsü mesüra yirua alirtem junga mekümdaktsütettsü saka state sorkari parnok ajak nem teyari agütsütsü" ta Khandu-isa shisem.

Arunachal chief minister-isa Ministry of Home Affairs den iba osang lemsatepogo aser tiyongtsü nung mapa inyaktsü atema shiogo, ta osang ka ajanga metetdaksü.

NEHU Vice Chancellor anema bushisüngdang asütsü akhanger



Shillong, June 16 (Agencies): NEHU vice-chancellor Prof S K Srivastava-i senden amenba indang tezüluba yanglushiba atema North Eastern Hill University

Teachers Association (NEHUTA)-i pa anema bushisüngdang ka süang ta takhangba agütsü. Senden nung hill areas' special allowance (HASA)

indang onük benoka jembiba nung pai yanglushi, ta NEHUTA-i ashi.

Tawa tu NEHU indang academic aser executive council sendentem amenba tezülubatem nung vice chancellor-i melenshi, ta NEHUTA president Prof X P Mao-i sangdong ka nung ashi.

Parnokisa India Tir aser NEHU visitor Pranab Mukherjee dang shidi ka nung iba onük metetdaksüogo.

"Executive council senden nung hill areas' special allowance agütsüba anentsü ta asübaji mulunga agizükogo ta vice chancellor-i Ministry of Human Resource Development dangi yok, saka ibaji senden nung züluba khenyongi balaka melenshir agütsüba lir" ta Prof Mao-isa ashi.

"Senden nung iba onükji academic council dangiang abentsü atema lemtet aser yamaji züluoka lir" ta paisa shisem.

GHADC nung administrator yimsüsüba agienogo

Shillong, June 16 (Agencies): Brihostibarnü Meghalaya cabinet-i Garo Hills Autonomous District Council (GHADC) nung administrator menden agientsü atema telemteba agiogo.

Cabinet senden amenba sülen Meghalaya Chief Minister Sangma-i osangbenertem den jembidang ashiba agi, iba telemteba ya Angh Banwarilal Purohit danga ashitsü aser GHADC nung chief executive member (CEM) shimtsü atema special session ka jazüktsü.

Congress-i aniba opposition-i no-confidence motion jazükba matongdang CEM Denang Sangma-i pa menden toktsü aser

iba sülen Cabinet-i April 1 nü administrator indang onük ya mezüng shidang.

April 4, 2017 Angh Purohit-ia ibaji mulunga agizük aser South Garo Hills Deputy Commissioner CV Darlong Diengdoh nem Council ketdangtsütsü mapa lemzüktsü. Taoba GHADC CEM-i Budget magizükdang menden toktsü aser iba jagi sorkari tiyongtsüi aitsüsa aküm, ta Mukul Sangma-isa ashi.

Züngsem 29 agi akümiba Council nung NPP züngsem 10, Congress 7, Garo National Council 4, independent 5 aser BJP o NCP nungi züngsem kaka lir.



TIR YIMYIM

YIMOBILEM (EDITORIAL)

DIMAPUR SATURDAY, JUNE 17, 2017

Sorkar Teladak Asütsüla

- Tangsen Lemtur

Nüburtemi sorkar atema inyaktsür masü, saka sorkari nüburtem atema inyaktsür, anungji sorkari nüburtem dang sorkar inyakyim aser sentongtem metetdaksütsü nüngdak, aser sorkar teladak asütsü nüngdak. Nüburtem dang sorkar sentongtem aser terenlok mapatem metetdaksütsüji kanga tongtibang. Ajioda India nunga Union Minister tem nungi tenzüker state aika nung minister temi nüburtem den tejak chitepa sensaksemer amato nüburtem dang 'Twitter' ajanga sorkar sentongtem aser mapatong balala metetdaksür, iba den külemi nüburtemi metetnua asüngdangbatem langzür. Iba ama inyakyim ajanga democracy tetezü tali ketdaksür. Tanü lima nung Information Technology ainba den liromedema asen state nunga Minister/MLA temi nüburtem den Twitter ajanga sorkar sentongtem metetdakja sensaksemra parnoki nüburtem taginüba metettsü, aser iba nungji ajemdaker nübur tajungtiba agi tenzükra koda tajung süla. 2014 küm Centre nung BJP-i aniba sorkar tashii aruba sülen linük nung 'Digital yimsüsüba' tenzükogo. Ato kilonser mangdang 'Sorkar tenzüker ishiba, tajungba yimsüsüba' ataloktsü nükjidong nung Modi-i tenzüker par minister tem aser ministry temi Twitter ajanga sensotem den sendaktepa sensaksem tenzüka sorkar teladak asütsü aser nübur den sendakteptsü atema iba sabang (Twitter) ya amshir. Au, Centre sorkar daka tashimait jenti alitsü südi, ajisüaka tesüiba küm asem nung Modi yimsüsüba kübok minister tem ochimashi ken o nung tai tongloktsüba osang mali, aser iba ya pa nükjidong ataloker südi ta bilemer. Ajioda tang mezüng yimtenren putiotsü nung linük nung Centre sorkar minister tem shilem 95-i Twitter amshia nüburtem dang sorkar mapatong balala metetdaksüba den parnok den jungdak sensaksemer (live conversations). Sorkar teladak, tetezü 'sorkar mapatem atema sorkari nüburtem nem telangzüba agütsütetba' ta ashitsü akok. Democracy linük ka nung kodang sorkar teladak südir sensotemi par sorkar mashileni aoba-a azüoktettsü, ochjimashi ajema akümtsü, sübokrem ajema akümtsü aser sorkar ketdangsertemi meshitaki inyakba mapatem azüoktettsü. Democracy tashi aittsü atema teladak sorkarji kanga tongtibang, kechiyong sensotemi sorkari koba tashi ka inyaker, ibaji asadangtettsü, aser taruba election nung shirnok nem vote agütsütsüar telemtetba agitettsü. Kodang sorkar teladak südir sensotemi pei tebilemba sademsadema lemsateptettsü aser linük yangerba nunga shilem agitettsü. India nung ochimashi anema tentetba melungtet telok, Transparency International India (TII) aser International melungtet telok, Open Society Institute-i democracy limatem nung azükaru aser terenlok alitsü atema alima tesem ajaklen sorkar teladak asütsü atema jembia inyaker. Küm shia sorkar tongtibang anogotem nung sorkari inyakba mapatem osang agütsür, aser ibaji ajanga nüburi sorkari inyakba mapatem metetter. Ano Ato kilonser, Modi-ibo ita shia radio sentong 'Mann Ki Baat' ajanga linük sensotem den pei kidang mener jembir amato sorkar mapatem aser sentongtem metetdaksür, aser Twitter ajanga linük nüburtem den jembir. Nagaland sasep nunga, state jenjang ngur yimtenren party balala yimsüsüba kübok terenlok aika kaogo, talisa nüburtem taküm libaliro nung kanga renlokogo. Ajisüaka India nung Tamil Nadu, Kerala aser Gujarat ama terenlok aliba state tem den menepetpa renloktsü asoshi Nagaland nung ochishir sorkar, nübur meimba lenirtem aser teladak sorkar nüngdaker. Kodang Nagaland nunga gari lenmang nung ongken melilir, kodang light junga arudir, kodang yimtsüngtem nung terenlok kadir, kodang sorkar mozükitem tajung lidir, kodang itasen shitak agütsüdir, kodang Centre nungi yokba sen shitak amshidir, kodang scheme ajak shitak inyakdir, idangji ang asen state-a terenlok aliba state tem rongnung adentsü, aser item ajak atemaji sorkar teladak nüngdaker.

OLEMSABANG

DDT- Tekümdangtsü

Contributed By : Dr. Toshimenla
Block Technology Manager, ATMA, Ongpangkong North Block.

Courtesy : ATMA, Mokokchung.

(Taoba adok nungi...)

Ano tsünüsempongtsütem mesen nungi kümzüksü mechi DDT amshidang, item tsünüsempongtsü nung-a DDT miim me yoktepa toker. Kodang nisungi item DDT densema aliba ozü, shirurutem, ango aser iba mesükba aser tsünüsempongtsü chidir, asen temang nunga DDT miim tiemtiba ainer.

Yamaji iba DDT miim ya asen chiyongtsü cycle (food chain) ajanga ango-ozü-shiruru aser meimchir tashi nung mezülungi teimba-teimba aiener. Ano, meimchir-i DDT alu aser kidang amshidang, asen teküp (dermal penetration) ajanga DDT miim asen temang-i aiter.

DDT ya temo nungbo yimsa aor (lipid soluble) anungji iba miim ya shiruru aser meimchir temang kolen temo alir (body fats) item tesem nung dena alir aser temang nung tashidak jenti adokdaksür. DDT amshiba ajanga tongtibang tashidak adokdaksübatem; Tetsürtem mama cancer (breast cancer), tebur tabung (male infertility), tetsürtem tanur tanur junga mebenteti magitetba (miscarriage), temesen nung timtem (liver damage), tezü timtem (damage to nervous system) etc. Ano DDT-i teintet denbo tanur küm 0-19 tashi (pre-puberty & puberty age) nem ang timtem teimba agütsür ta-a bushitetba report lir. Ano, tanur shir daksa DDT miim bena lir, parnok temang aser shisatsü ainba nung tangar memeneper (developmental delay). DDT amshiba ajanga asen temang nung iba amala ano timtem aika adokdaksür ta-a ashir.

Alima ajak nung nütsüngtemi DDT ajanga shiruru aser asen temang nung timtem adokdaksüba aser ano tarutsü putu asoshia ali-tzü-mopung jenjang menentsüba aser raksadaktsüba angateta, alima aika nung DDT mozü ya joko mamshitsü telemtetba agidar. Anungji DDT amshitsü akok tashi ajemtsü merangtsüla aser tanga merla tepsettsü lenmang bushia inyaktsüla. Saka asen nuburtemi aluyimba nungbo DDT mozü ya kenyongi mamshitsüla. Asenok temang nung timtem magutsüba organic mesen tepsettsü mozü tajung aika lir, itemji bushia asen aonsotsütem anepaludi.

Malaria tashidak azüoktsü asoshi asen temeket nung tzü atsünga mayutsü atema drainage junga yanglua ayutsüla. Kilentzü aodak aser tsüto-tem aser kidang kimong arem merüka ayuba ajanga merila zuinba ajemdaksütet. Iba den külemi merla sü (bed nets) amshiba mesüra ramen tashidak nungi kümzüka alitsü atema anti-malarial mozütem achiba ajanga DDT mozü amshiba ajema kümdaksütet. Lokti senden, Ward aser Village Council aser kija taküm ajaki külemi teka amteper merla timtem ajemdaksütsü inyaktsü kanga tongtibang. Nüburtem nem awareness programme ano maneni agutsütsü nüngdaker. Government-i maneni merla ajemdaksütsü ano programme tajungba yanglutet.

Ne arishi wazüka yuang

- S. Panger.

Aser Tsüngremi parnok moatsü, Aser Tsüngremi parnok dang ashi, Soyapokyang aser jenti renang, aser alima süngdakjang, aser aji azüokang. Lipok 1: 28.

Tenük agi anguba aser mongui aliba kechisarena ajakji tepela aser jangratemtsü asenok asoshi moatsü. Tanü putu nung Tsüngremi temeim agi nisung melamela alitsü, sademsadema alitsü moatsüogo, jenti arenba aser tanga temoatsütem arishi taküm atema agütsüogo.

Tsüngremi mapa teinyaktsü ozüng ka agütsü, renlokba ajak azüokang! Pa telatet ozüng agizüka amshiba ajanga arishi wazüka junga alitsü, nisung asoshi tepela tesenep aser temoatsü ajakji arishi (longevity) akatsü lenmang bushitsü temulung nung tenok tenoka yuang. 1 Chuba 3: 14, Nai nebu David-i jajaba ama kü telatet ozüng aser kü temelaba amshia jajara, idangji Ni na arishi talang kümdaksütsü.

Kodak, ali aser tetsü (mother) temoatsü asoshi arishi wazüka yudi, tangar yimtsüng aser jila nung koma ataloker ni meshitet, saka ni alidak CTN Town nung 2016 küm tatem tashi nung pensioners 200 nungi 134 life pensioner aser 66 families pension ajakji tetsür amitsür dang, tasürtemji küm 80 abensababo nisung 5 shi dang, saka 61 tasürji küm 52 mabensa ta ni bushitet aji lokti nem tezülua nung agütsü.

Ocet züluri shinübaji teburtem arishi wazüka makai tetsür aser tanur doktsür süadoker! Lipok 1: 28 jagi Tsüngremi moatsüogo, kipok sayu agi peria sayutsü ajaki mulung yudi, arishi wazüka ayutsü pei temang nung pei sasa inyaktsü Tsüngremi telatet ozüng asentenshia agizüka inyaka lidi.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

Mezüngbuba Naga headmaster Guizang Meru nem tetushi agütsü



June 15, 2017 nü Impur cemetery nung asür Guizang Meru Zeliang (mezüngbuba Naga headmaster)'er kinungertem den ABAM ketdangpurtem aser temeimertem külemi agiba noksa ka angur.

Impur (Mokokchung), June 16 (TYO): Naga loktiliba nung mezüng shisaluyimertem nem tetushi agüja, Impur cemetery nung Naga nung rongnungi mezüngububa school headmaster Guizang Meru Zeliang indang leper tasen ka yangluba sayaogo.

Guizang Meru sor küm 123 ajungba anogomung nung Brihostibarnü ABAM ketdangsertem, asür Guizang'er chinur aser semchirtem, kinungertem aser temeimerten iba sentong nung aden.

Asür Guizang Meru nungi jakzüker parnok nisung 13 tashi Impur Mission Centre-i aru aser idakji pa indang leper tasen yangluba nung naroyu tetushi agütsü.

Parnokisa, asür Guizang inyakba school, Impur Mission Hr Sec School semdang aser tesayurtem den ajurutepa sensaksem mapang agi.

Iba nungtem ung ABAM-ia Covenant Hall, ABAM Office nung sentong ka ayongzüka agi.

Asür Guizang Meru Zeliang (1894-1918)-i Naga nung rongnung mezüngbuba headmaster inyak, ta record balala nung zülua lir.

Pai 1915-1918 tashi Impur Mission School (tang Impur Mission Hr. Sec School) nung headmaster inyaka liasü.

Pa ya Peren district kübok Benreu yimtsüng nung liasü aser tebuji Heizieluing liasü. Tebuji par yimtsüng nungi mezüngbuba Khristan listü aser

pai par jabasa mezüngbuba Tsüngrem tenzüka wadang nung inyakdaksütsü ta bendanga agütsü.

Guizang-i matriculation tatidang agütsüba sülen, tebuji aginüba ama Impur Mission Centre nung tesayur ka ama inyak aser 1915 nung headmaster aküm.

Ajisüaka, iba mapang Impur tesem nung alirtem dak saksüpokshi tashidak agi kanga atong aser asür Guizang-i shirangertem yaritepdang, tia maka pa-a iba tashidak mena aser arishi küm 24 nung lia, November 4, 1918 nung pa asü.

Asür Guizang indang taküm otsüji kanga dang tesasatsüka lir, kechiyong iba mapang ka kibong kümlü liasü aser kinungtsüji par yimtsüng nung lia pa asü aser Impur cemetery nung arem.

Pa sür küm 90 ajungba den külemi pa sor küm 123 ajungba anogomung tenüng nung, WAM Event Management kübok lanur telok kati Ao Baptist Arogo Mungdang aser asür Guizang'er kinungertem den yaritepa asür Guizang Meru bilemteta tetushi agütsütsü sentong atong.

WAM Group-i asür Guizang indang mangji tutet aser leper nung tesem tajung ka nung pa indang leper tasen yanglutsü.

Taoba NBSE Chairman, Nini Meru ya asür Guizang'er kinunger lir aser lai ABAM o WAM Event Management Group na dang pelaba metetdaksü.

Laisa ashiba agi, asür

Guizang indang leper tejenba nung enoka aliba 'tombstone' ji Benreu yimtsüngi bener oa kinungertem indang leper nung nungo ama ayutsü.

Sentong nung ABAM Executive Secretary, Rev Dr Mar Atsongchanger-i jembidang ashiba agi, asür Guizang indang takümji tatsüka dang liasü saka pai shisaliok atema bendanga agütsüba aser nendaka inyakba ajanga paji nisung balaka liasü ta asenok dang sayur.

Asür Guizang-i toktsür aoba senmang tajungji tanüa asenok den taküm lir aser pa indang taküm otsü aser 'tesayur tajung' ajanga inyakba mapa tajungtem tanü tashi Impur nung alirtemi aser ano Mission centre-i arurtemi jembir, ta Rev Dr Mar-isa ashi.

Asür Guizang'er kinungertem timtem jenti arema Impur-i aruba atema Dr Mar-isa pelaba metetdaksü aser ABAM Executive senden nung asür Guizang nem tetushi agüja Impur cemetery nungja melentsü indang onük benoka lemsateptsü, ta paisa shisem.

Asür Guizang indang leper nung naroyu tetushi agütsüba mapang, Dr. Mar-i Impur Cemetery dang 'Guizang Meru Zeliang Memorial Cemetery cum Park' ta ajatsü mulunga lir ta shia liasü.

WAM Event Management aser ABAM yaritepa 2018 küm asür Guizang sür küm 100 ajungba nungtem nung sentong balala ayongzüka agitsü tebilemba lir.

ANOGO ABEN TSÜNGREM DEN

TENEM NUNG KANGKI-ASER KÜ MULUNGJANG NUNG

'Aser shir Khrista Yisu nübur parnoki shi agi jangraba aser jabujari kangki nung angenlokogo.' - Galatia 5:24

Asangur nisung kati kenü temeshi nisung tambur ka dangi arua asüngdang, "Oba, kangki nung angenlokba tetezü kechi?" Tambur nisung jagi tatsü ka bilemdang aser ashi, "junger, kangki nung angenlokba tetezü mapa asem lir. Mezüngbuba nisung shiba kangki nung angenloker pai/lai tetuyuba ka nung dang rangloker." Ni ibaji aginer- tetuyuba ka nung dang rangloker- aser ibaji Tsüngrem aser Khrista aser tanela temeshii tetuyuba... temulung asüba tetuyuba aser Tanela agi sünga aliba taküm tuyuba.

Aser tambur nisungji pa tekolak nung ken menokshi aser ashi, "Ano mapa ka; jabaso, kangki nung aliba nisung kati- pai meyipa maor." Kangki nung asüba nisungi tebutü dang, "Salem, kü meimla. Ni minute ishika lir meyipa arutsü ta mashir."

Kodang na kangki nung angenlok nai salem ashir- na meyipa maor!... shibai Khrista den adener akümer pa/la amangdakjang... pai/lai meyipa maotsü aser atangchila Khristan taküm kadakjang.

Khristan taküm shia temulungjang nung kangki ka aser chuba menden ka kar, aser pei sasa kangki nung ali tashi Khristan kaji chuba menden nung alir.

Impur Baptist Arogo ajanga Aor Putu Yimsüsür Asentenshi sentong



Dimapur, June 16 (TYO): Impur Baptist Arogo ajanga Aor Putu Yimsüsür Asentenshi sentong June 13 - 14, 2017 "Kibuba onok asentenshijang" (T. Ken 85:6) omen nung ajemdaker sentong temoatsü nung agitetogo.

Iba sentong nung yimtsüng 48 nungi yimsüsür 177 arua shilem tajung agi.

Sentong nung O jembirtem Rev. R. Teka Pastor Impur Baptist Arogo, Rev. Dr. Mar Atsongchanger Executive Secretary, ABAM, , Mrs. Alemla Mozür Secretary, ABAM WM aser Mr. Chubatemen Ozüküm Coordinator, Sunday School ABAM liasü.

Iba sentong nung tongtipang onüktem itemi liasü. "Kin ka yangerba nung asentenshi", "Yimsüsür kija shia Tsüngrem O beshiba nung asentenshi", "Yimsüsür ka teinyaksü nung asentenshi" aser "Asentenshi nung Yimsüsürtem shilem"

Olemsatop mapang jembiba tongtipang onüktem kar:

1. Yimsüsüba Menden ya Tsüngrem nungi lir, anungji

Yimsüsür ka takümji temeshiba aser ochi nung alitsüla ta lemsatop.

2. Yi samatsü atema Arogo, ABAM aser Yimten shia temzüng takang lateta aliba ama, temzüng ochishia amshitsü ajungshitep.

3. ABAM aser Arogoi nokdakba ama Yimten shiai Clean Election nung shilem agitsü lemsatop.

4. Khristan yimsü anema telok asoshi tekümdangtsü o akang akanga lemsatopa liasü.

5. Tanü Aor yanglushitsü asoshi Yimsüsüba menden nung asentenshi nungdakba tenok tenoka jembia liasü.

6. Arogo aser Yimten kati ka dang taoba ta angateta külemi tanü alima raksa aliba yanglushitsü mapang tongja tongogo ta lemsatop.

Amangbapur ajaki asen Aor yimsüsürtemi tasü ita ochi nung yimsü asütsü asoshi sarasadem nung nungittsü Impur Baptist Arogo ajanga mepishir aser yimsüsür aser arogo ajak dang pelaba lemsar, ta Impur Baptist Arogo sangdong ka nung metetdaksü.



Yimozülur Dr. Temjen Jamir, CCPRA Programme Coordinator Ms. Imtiwala aser CTC Principal Dr. Marnungsang nungertem "Racism, the Thorn in the Human's Peaceful Coexistence" ta ser kakat ka sayadang agiba noksa angur. Iba kakat ya Clark Centre for Peace Research and Action (CCPRA)-i ajanga adok aser June 14, 2017 nü multi-purpose Hall, CTC nung Principal Rev. Dr. Marnungsang-i sayatsü.

OLONG PAITEP # 4454

		1		2		3			4	
						6				
						7		8		9
				10						
11										
12	13			14						
15										

TIPIEN

- 2. Pelatepa watitepba - 7
- 6. Kibong yongsük - 5
- 7. Tekaraba nung - 5
- 10. Molunga langzü - 3
- 11. Akhidang aiürtem ayipdak - 5
- 12. Tebang nungi o jembiadok - 5
- 15. Tetemjen - 7

LANGTSÜNGLEN

- 1. Temang nungi aluba tzü - 7
- 2. Azü ajemba shiruru tila ka - 7
- 3. Taleptsü yin - 3
- 4. Azü _ _ _r - 3
- 5. O bangjema jembitet - 6
- 7. Lokti yimten anishiba yimya - 7
- 8. Okrong - 7
- 9. Mejanga oner - 6
- 13. T _ _ _ n - 3
- 14. Ita ter ana - 3

OLONG PAITEP # 4452 TELANGZÜBA

TIPIEN :

- 1. Aben, 5. Menden, 6. Lenden,
- 7. Alet, 8. Ulu, 11. Ang, 12. Ajak,
- 13. Sabang, 14. Tenyar, 15. Tara.

LANGTSÜNGLEN :

- 2. Balala, 3. Ken, 4. Anogo,
- 5. Menunrar, 9. Tangar, 10. Lokti
- 13. San.



Lanurtemi rataa bilemba onük khar Alokba dang asüngdang

- Lanur** : Revival ken ka nung "Yisu yakta arur" ta shia lir. Saka kechiba Pa tang tashi marur?
- Alok** : Ken nung aliba orenji yimden nung nülak songa jembiba ama masü.
- Lanur** : Asen lima nüchiso yakta angutsü amai osangkaket nung züngshi, saka tang tashi mangur na?
- Alok** : Nüchiso asoshi mapang talangka agir. Iba ya bazaar nung oset o sen na petpet ta agütsütepba ama masü. Iba yabo süngjangji zünger süngdong tulu talang küma meyr, iba nungji süngjang mener ang ongzüka achiba ama mapang agir adi.
- Lanur** : Tenemtsüng lenmang yakta renemtsü amai angashi, saka osangkaket nungbo sen maliba agi anendaka lir ta züngshir. Süra ya kodang ang renemtsü?
- Alok** : Kodang sen kadir idangji renemtsü adi.
- Lanur** : Mokokchung Jila nung küm shia ita pongubo pipe nung tzü teperi angutsü ta nai ashi, saka mangur ado.
- Alok** : Küm shia tzünglu arudang ita pongubo tzüla nungi rubber pipe teyari ajanga tzü denzüka ajemer do. Rubber pipe jia pipe-sa ado.
- Lanur** : Wha! Alok ne den kechi anga mejembika, süra tatem nung ka tang asüngdangdi, Tuli paper mill ya-a yakta renemtsü ama angashi, saka tang tashi merenemer na?
- Alok** : Iba ya nenoki tetenzük nung asüngdangba ama "Yisu yakta arur" saka tang tashi marur ta asüba den saku adi.
- Lanur** : Wha! Ojang asüngdangdi. He!He!He!
Lilir: A.Maong Aier, Alongmen Ward Mkg.

Tepela Tasoba Anogo

Tanur asoba anogo nung salem osang den noksa angati adokdeksünura - Tenüng, Küm, School, Talidak & salem osang tejanga züür, noksa (photograph - any size) ka den anogo 3 mesüra 4 jela e-mail : tryimym@gmail.com nung yokang mesüra Tir Yimym bureau tem nung agüjang.

1. Tenüng : _____

2. Tasoba anogo: _____

3. Küm : _____ 4. Class : _____

5. School : _____

6. Talidak : _____

7. Salem osang : _____

NAIA YA METETER MA



Rajasthan kübok Jaipur yimti nung kibong ka nungi Doctor 31 tashi lir. Iba kibong nungi Physicians, Oncologist, Ophthalmologist, Ent Specialist, Orthopaedic Specialist, Urologist, Psychiatrists, Patholists aser Neurologist doctor tem lir. Iba kibong nungisa Vinamrita Patni-i tawa RPMT nung jenjang 107buba nung takok nguogo, aser la MBBS course atemba sülenbo iba kibong nung la doctor 32buba akumtsü.

TANÜBO NAI LANGZÜANG

Q: India tsür rongnung tang mezüngbuba International Tribunal for the Law of the Sea (ITLOS) nung judge shiba shim?

[A] Nirmila Randhawati [B] Aniruddha Rajput [C] Neeru Chadha [D] Nidhi Bhandari

===== (Taruba adok nung onoki langzünsü)

YASHI ADOK TELANGZÜBA :Give Blood. Give now. Give often

SUDOKU # 3566

8	4				7	1	6	7	9	8	5	3	4	2	1		
			8			5		8	5	3	2	1	4	7	9	6	
	6					4		4	2	1	9	7	6	5	3	8	
	7		1	3		4		9	8	7	3	6	2	1	5	4	
	2	3				1	9	8	2	3	6	1	4	5	8	7	9
			5				3	5	1	4	7	9	8	3	6	2	
7	9							7	4	8	5	2	9	6	1	3	
			2			9		3	9	5	6	8	1	2	4	7	
		8	4			3		1	6	2	4	3	7	9	8	5	

TELANGZÜBA # 3565

OJANG LUTEP # 4061

- SINGUN :
- KAAI :
- AKD :
- SATHI :
- LIMA :
- MÜAS :
- KASA :
- ULNEGTTETEMBA :
- SITSÜSAH :
- LIAM :

OJANG LUTEP TELANGZÜBA # 4060

MANGER MESANGWADANG YONGI TAKAR AKUMBA NUNGJIBO MELUNG MALEMTSÜ TULU LIR

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdang (Horoscope):



Aries
21/3-19/4

Mapang talangka metembang aliba mapa ka nai tanü tembanga inyaktettsü. Nü dangi aruba maangka ajak na agitsü merangang.



Taurus
20/4-20/5

Tanü anogo medemer kar dang nungi nai teyari nungdaksü, aser parnoki na yaritsü. Nü dak mapa takok ngua inyaktettsü sempet lir saka iba yimya melenshia inyakteddang.



Gemini
21/5-20/6

Nai tanü nü mapa nung temolung agüja inyaksü nungdaker. Aser nai lokti nung amshiba yimya amshi nü mapa nung takok angutsü merangang.



Cancer
21/6-22/7

Kidang kiyonger den rarabangsen madoktsü merangang. Telemtetba tajung ka agitsü asoshi tanü anogo tamajung asütsü, anungji nai item telemtetbatem tanga anogo nung agiang.



Leo
23/7-22/8

Tanü na azünga aliba mapang nür medemer tem ajungshitsü anogo tajung asütsü. Tanü anogo nai senotsü kümdanga amshitsü merangang.



Virgo
23/8-22/9

Tanü anogo nai ner kinüngertem den tesendaktep tajungba küma yanglushitsü merangang. Kidang kibong nung nai tongtipang shilem ka agitettsü.



Libra
23/9-22/10

Tanü nai tangar asoshi tali mebilemtsüla, kechiyong iba ajanga na majangzüksü. Aser nü inyakyim nung timtem majurutsüsa kümdanga inyakang.



Scorpio
23/10-21/11

Nü dak tejangraba molungsentsü aliba ji nai nü mapa nung amshiang. Aser tanü nai o kümdanga jembitsü merangang.



Sagittarius
22/11-21/12

Tanü anogo nü shisatsü kanga mesüngjemeti alitsü. Nai jangraba maparen kar nung temolung agüja inyaka amongtsü merangang.



Capricorn
22/12-19/1

Nü mapa nung nai anisüngzük magie inyakba ajanga na aiben anibelem tali alir. Anungji tanü nai nü ma melenshia inyaksü merangang.



Aquarius
20/1-18/2

Tanü nai nü molungjang taroktiba nungi nü tarutsü anogotem asoshia süoki yia bilemdangtsü junger. Tanü nai lokti aser yimden indang khuret mabentsü merangang.



Pisces
19/2-20/3

Tanü anogo nai mapa ajak tip-tema inyaksü merangang. Aser tanü anogo nai sentong yangluba ajanga tarutsü nung takok angutsü.

Ryan aser Ken nati Production company ka amenokogo

Los Angeles, June 16 (Agencies): Actor Ryan Gosling-i production house ka tenüng agi Arcana ta ser producer Ken Kao den külemi amenokogo. Tena 'Favourite' film nung külemi lonjemer inyaksü aser iba film ya director Yorgos Lanthimos-i direct asütsü, ta osang ka ajanga metetdaksü.

Arishi küm 36 tain Gosling-i iba film nung shilem agitsü asoshi La La Land co-star Emma Stone aniokogo aser tena den külemi actress Rachel Weisz aser Olivia Colman natia iba film nung tongti shilem agitsü.



'Favourite' film indang script ya Deborah Davis aser Tony McNamara nati zülü. Iba film otsü ya House of Stuarts tetembangbuba monarch Queen Anne yimsüsüba mapang indang otsü ka lir.

Maneni Arcana company ya Scarlet Films nung producers Ceci Dempsey, Element Pictures nungi Ed Guiney aser Lee Magiday aser Film4 and Fox Searchlight den longjemogo.

Gosling aser Kao na taoba mapang nung Shane Black indang detective thriller, The Nice Guys aser Terrence Malick's Song to Song nungger film nung külemi inyakogo. Tenati ano Jeff Lemire indang novel 'The Underwater Welder' nung ajemdaker film yanglutsü asoshi temeden ngutetogo aser film atema otsü yanglushidar.

Saif Ali Khan aser Karan Johar nati IIFA 2017 host asütsü



Mumbai, June 16 (Agencies): Bollywood nung actor Saif Ali Khan, Karan Johar den külemi 18buba International Indian Film Academy (IIFA) Awards host asütsü. Iba sentong ya New York nung taruba ita agitsü.

"Ni IIFA sabang nung tanaben shilem agitsü asoshi pelaa bilemer aser taküm IIFA Awards New York nung kü medemer Karan Johar den

külemi iba sentong host asütsü," ta Saif-i ashi.

Bollywood youth icon Varun Dhawan taküm mezüngbuba IIFA Awards nung shilem agitsü aser July 15 aonung star-studded awards shilem ka pai co-host asütsü.

"Iba sentong ya kanga dang meraketa amongtsü aser iba nung adentsü asoshi matateter," ta Varun-i ashi. 2017 IIFA sentong ya

MetLife Stadium nung amongtsü aser iba sentong ya India nungger film, music, fashion aser tsüngsang balala sayaa pelatepba mapang ka asütsü.

Sentong nung maneni Bollywood nung nungtugu actor Salman Khan, Alia Bhatt, Katrina Kaif, Shahid Kapoor, Sushant Singh Rajput aser Kriti Sanon nungeri shilem agitsü.

Award agütsütsü anogo ka lia 'IIFA Rocks' sentong ka akatsü aser iba nung A.R. Rahman-i shilem agitsü. Maneni Rahman den külemi Diljit Dosanjh, Benny Dayal, Javed Ali, Neeti Mohan, Jonita Gandhi aser Haricharan Seshadri nungeri shilem agitsü.

Riteish Deshmukh aser Manish Paul nati IIFA Rocks sentong host asütsü.

Iba sentong ya Wizcraft International Entertainment-i ayongzuka akatsü. IIFA sentong ya US Tampa Bay nung 2014 küm agiba sülen taküm agitsü aliba ya tanabuba asütsü.



New Delhi, June 16:- Brehontibarnü Prime Minister Narendra Modi nem Khushboo Akash Davda-i pearl agi yangluba noksa ka agütsüdang tangokba noksa nung angur.

TAN HOPTA ATEMA - KOMA SÜLA ?

Q. Center sorkari nashi maleptsü ozüng latetba ya magienra, Nagaland India kübok malitsü ta Nagaland nung aliba lokti tentetemi ola adok nunga koma süla ?

Olong 20 shi nung June 16, 2017 tashi nung iba telangzüba ya onok dangi e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Deobarnü adoktsütsü.

Voice aser data nung jenjang ajemtsü asoshi Telecom operator ajanga TRAI dang ashir



New Delhi, June 16 (Agencies): Linük nung telecom industry ajanga 'free offer' balala agütsüba mapang telecom company kar ajanga 'voice' aser 'data' nung jenjang ajemdaktsütsü asoshi Telecom Regulatory Authority of India (TRAI) dang Brehostibarnü shidanga lir.

"Voice aser data service atema 'floor price' yanglutsü asoshi tanü telecom operator temi jembi. Iba nükjidong ya, iba jenjang telatet dang tajemba nung operator katia data aser voice service magütsütsü," ta telecom company 7 den ghonda ana dak tali senden amenba sülen TRAI mendenbuba, R.S. Sharma-i osangbener dang ashir.

"Iba 'floor price' ya technology aser network amshiba amala nung ajemdaker alitsü. Iba ken o ya kanga tebenja lir. Aser iba sentong ya koma inyaktüar ajia ken o ka lir. Telecom operator den onoki iba sentong asoshi molungtepogo saka anu jungjunga jembishitsü," ta TRAI

mendenbuba-i ashir.

Iba 'floor price' ya renemtsü asoshi mapang telatet kicha Sharma-i mashi.

Iba 'floor price' ya TRAI indang tariff tem den meputeptsü, ta pai metetdaksü.

Iba senden nung arua atener ya Bharti Airtel, Vodafone India, Idea Cellular, Reliance Communications, Reliance Jio, Airtel, Tata Teleservices, MTS, BSNL aser MTNL amala lir. Jio ajanga voice aser data service tem nung angati maongka agütsüba ajanga mobile market nung temelenshi arudaktsü.

Operator temi licences fee tajemba kümdaktsütsü asoshia shisem. Telecom company indang Goods & Services Tax jenjang shilem 18 aliba ajemtsü aser Universal Service Obligation Fund agientsü asoshi operator temi asüngdang, ta Sharma-isa shisem.

Iba senden nung shilem agirtem ya Bharti Airtel nungi India aser South Asia indang Managing Director & CEO, Gopal Vittal; Reliance Jio nungi

Strategy & Planning nung tekolakba, Anshuman Thakur; Vodafone India nungi CEO, Sunil Sood; Idea Cellular nungi Managing Director, Himanshu Kapania;

Reliance Communication Director, A.N. Sethuraman, Airtel inadang CEO aser Managing Director, Kaizad Heerjee aser Tata Teleservices nungi Managing Director, N Srinath nungertem liasü.

Iba senden nungsa interconnection usage charges (IUC) indang workshop anogo ka agitsü renem aser iba workshop ya July mezüng hopta mesüra tanabuba hopta nung alitsü.

Wireline connection tem ajungkettsü aser telecom sector nem 'infrastructure status' agütsütsü asoshi telecom operator temi TRAI dang ashir.

"Telecom operator temi ashiba ajak angadongogo aser onoki telecom industry ya junga lidaktsünür. Tangar den toktepba industry ka aginür. Aser nüburtem nem jenjang tajemba nung service agütsüba aginür," ta Sharma-isa ashir.

Kashmir nung mobile internet shibangtsüogo

Srinagar, June 16 (Agencies): Mitkartemi injang khashiba mapang lanur ka asüba sülen densa tamajungba küma Kashmir Valley nung ketdangsertemi 'high speed mobile internet facility' shibangtsüogo.

Fixed landline broadband connection indang tekerat tajemba kümtsüogo.

Brehostibarnü Srinagar nung mitkartemi injang khashiba mapang iba tesem nung alir lanur, Naseer Ahmed yiru aser iba yiruba ajanga Hokulbarnü asüba sülen densa tamajungba kümogo.

Sashastra Seema Bal (SSB) police den nüburtemi long agi

ona raraba mapang Rabgreth nung Naseer dak teku nung injang agi khashi.

Naseer ya Sher-e-Kashmir Institute of Medical Science (SKIMS) mozüki-i bener ao saka mekümsükteti asü.

Mapa tamajung inyaktü janrar temi social media balala nung noksa aser post balala prokshiba nungi nokdangtsü asoshi internet ya shibangtsüsa aküm, ta ketdangsertemi ashir.

Hokulbarnü separatist temi longkak aittsü ayongzüka aliba nokdangtsü asoshi tongtibang tesemtem nung police aser Central Reserve Police Force (CRPF) tem yoka lir.

HTC U11 smartphone India nung sayaogo



New Delhi, June 16 : HTC South Asia tir, Faisal Siddiqui-i New Delhi nung Hokulbarnü HTC U11 sayatsüba mapang tangokba noksa nung angur.

New Delhi, June 16 (Agencies): Qualcomm Snapdragon 835 chipset aketba HTC U11 smartphone tanü India nung sayaogo. Iba samrtphone nung 'Edge Sense technology' keta lir aser iba ajanga iba phone amshir-i phone nung ajetba ajanga phone-i mapa balala inyakteter.

HTC ajanga iba U11 smartphone ya Taiwan nung taoba ita sayar liasü.

Iba phone nung function balala inyaktü asoshi pressure balala agüja ajeter. Iba phone ya United States, UK aser Germany nung amshitsü atema Google Assistance aser Alexa support inoka yanglua lir.

U11 phone tereprangtsü ya HTC U series den kasa lir aser phone tesülen 'liquid surface glass' inoka lir aser iba glass telung nung sentüsü balala inoka lir.

HTC indang U11 phone ya Sapphire Blue, Amazing Silver, Solar Red, Brilliant Black aser Ice White sentüsü nung angur saka India nung iba phone ya Brilliant Black aser Amazing Silver sentüsü nung dang angutsü.

U11 phone indang display ya 5.5-inch Quad HD 2K lir. Iba

phone tesülen aser tejaklen ajunga nung 3D glass inoka lir. Tang alima nung chip tasentiba, Qualcomm Snapdragon 835 SoC ya iba phone nung keta lir.

Iba phone indang tesülen camera nung UltraSpeed focus den 12-megapixel, dual-pixel autofocus, f/1.7 aperture, OIS aser electronic stabilisation keta lir. Iba phone camera nung Auto HDR Boost inoksema lir. Tejaklen aliba camera ya 16-megapixel aser tesangwa junga maliba nung noksa agitsü junger aser wide-angle lens keta lir. Iba camera nung Selfie Panorama mode densema lir.

Iba HTC U11 smartphone nung standard 3.5-mm jack mali aser USB Type-C port, Bluetooth 4.2, Wi-Fi 802.11ac, NFC, GPS, GLONASS aser Beidou keta lir.

Iba smartphone nung USonic Boomsound Hi-Fi Edition speaker keta lir.

HTC U11 phone nung ya tzü mamonger aser 64GB mesüra 128GB internal storage keta lir aser microSD ajanga memory tuluba inoktetsü akoker. Iba phone indang battery tashi ya 3,000mAh den Qualcomm indang Quick Charge 3 angutsü.

Kiralongra nungi kümsüktsü asoshi Facebook nung sentong tenzüker

June 16, 2017 (Agencies): Alima nung ita shia Facebook amshir billion 1.94 lir aser iba sapang ya kiralongrar atema tesem tajungtiba lir, ta Facebook Inc. ajanga ashir.

Facebook ajanga kiralongrar temi olulu prokshiba den külemi kiralongra mapa inyaktü nübu shimtsü akoker, ta nisung kar-i ashir, saka Melon Park, Northern California nung headquarter aliba Facebook ajanga iba sapang nung kiralongrar mapa

meinyakdaksütsü bendanga agüja inyaker, ta ashir.

Social media ya keralongrar nem agütsüba sapang ka masü, ta Facebook indang Global Policy Management nung Director, Monika Bickert aser Facebook Counterterrorism Police Manager, Brian Fishman-nati parnok website nung zülutsü.

Iba company nung counterterrorism specialist 150 dak tali lir aser item rongnung counterterrorism indang

academic expert, taoba mapang ozüng amshia alirtem aser taoba mapang law enforcement agent tem lir, ta company ajanga ashir.

Kiralongra mesükba video aser noksa tem Facebook nung inoktsüba nungi nokdangtsü atema Facebook ajanga artificial intelligence (AI) yua lir aser Facebook nung kiralongrar yarirtem indang page, group, post aser profile taila yangluba tem, iba AI ajanga reprangshiyim asütsü.



Nagpur, June 16 : Hokulbarnü Nagpur nung Bollywood actress, Shilpa Shirodkar-i 'Savitri Devi College & Hospital' TV serial drama tasen ka Colors TV nung sayatsü, ta sangdongba mapang tangokba noksa nung angur.



June 16, 2017 nū New Delhi nung Global Counter Terrorism Council-i ayongba senden nung Minister of State for DoNER (I/C), Prime Minister's Office, Personnel, Public Grievances & Pensions, Atomic Energy and Space, Dr. Jitendra Singh-i jembiba noksa nung angur.

Bank A/c lapoktsü aser sen 50,000 dak tema transaction atema Aadhaar nungdaksü

New Delhi, June 16 (Agencies): Ochimashi sen nokdangtsü atema Bank account tasen lapoktsü aser sen 50,000, aser iba dak tema transaction atema Aadhaar nungdaksü, ta Centre sorkari metetdaksü.

Bank account alir ajak danga taküm Dec 31 nū tashi nungbo bank tem nem Aadhaar agütsütsüla, ajimesüra item account ji magila akümtsü ta metetdakja liasü.

Income Tax department-ia nūburtem dang, sen lakh 2 dak tema transact masütsüla, ajimesüra sen agizüksangi kasa senji (sen lakh 2 mesüra kwi transact südir) senchi agütsütsü, ta metetdaksüogo.

Finance Act 2017 nung ajemdaker sorkari taküm April 1 nungi tenzüka sen lakh ana mesüra iba dang tema transact asüba nokdang.

Income Tax Act nung section 269ST ajanga, anogo

ka kija nung sen lakh ana dak tema transact asüba nokdang.

"Section 269ST oziung alema inyakra sen agizüksang dang senchi shilem 100 achitsü," ta tax department-i sangdonga lir.

2017-18 Budget benokdang Union Finance Minister, Arun Jaitley-i sen lakh 3 dak tema transact masütsü benokdanga liasü. Ajisiüka taküm March ita Lok Sabha nung Finance Bill agizükba sülen iba telatetji sen lakh 2 lakh dang aküm.

1993 Mumbai bomb lendong ken o nung nisung 6 aitsüogo

Mumbai, June 16 (Agencies): Mumbai nung bomb 12 pokdakja amakba lendong nung nisung 257 asü aser nisung 713 mejungi yirua liasü, iba tatalokba sülen küm 24 lir tanü Terrorist and Disruptive Activities (Prevention) Act court kati iba ken o nung Abu Salem aser Mustafa Dossa na densema nisung trok aitsüogo.

Kasa ken o nung aitsür tanga nisung pezüji Feroz Khan, Taher Merchant, Riyaz Siddiqui aser Karimulla Khan nunger lir. Ajisiüka iba ken o nung Abdul Qayoom Shaikh dakbo kuli menguteti chiokogo.

Defence aser prosecution nungi ken o angadanga sülen court-i temerenshi obendang agütsütsü, aser parnok aitsüra Siddiqui dak alaka tanünga

nisung pongu nembo tasüba temerenshi obendang agütsütsüa akok.

Parnok nem temerenshi obendang agütsütsü asoshi June 19 nungi tenzüka ken o angadangtsü.

Osangbener den jembidang prosecuter, Deepak Salvi-i, aibelenertem nem temerenshi tulu agütsütsü atema inyaktüsü, ta metetdaksü.

Tangbo police ket nung tai tonglokja alir shinga mali, ibayongji iba ken o nung tanü tatemsa obendang agütsüogo.

Tai tonglokja alir rongnung nisung 33 jenshia senzüdar, aser parnok rongnung Dawood Ibrahim, pa adianu Anees Ibrahim, Mustafa'er adianu Mohammed Dossa aser Tiger Memon nunger densema lir.

Salem ya 2005 küm November nung Portugal linük nungi anir arua liasü. Asüngdangyadang pai langzüba nung ajemdaker Siddiqui aser Shaikh na pua liasü. 2003 küm Mustafa Dubai nungi Delhi-i aruba sülen pa-a pua liasü.

CBI-i ashiba agi, 1992 küm December ita 6 nū Muslim nunger indang Babri Masjid raksatsüba mangyangtsü atema Mumbai yimti amak.

1993 küm March 12 nikonngang 1:30 ako nungi 3:40 ako tsüngda Mumbai nung bomb 12 tashi pokdakja liasü. Iba sentong yangludang UAE aser India nung senden 15 ben dak tema menogo.

Iba lendong nungsa sen crore 27 jenjang kiojen tesama ngua liasü.

Rajnath aser Venkaiah nati Sonia ajuru

New Delhi, June 16 (Agencies): Taruba linük Tir election dak sendakba nung tanü BJP lenir taintem- Rajnath Singh aser Venkaiah Naidu nati Congress Party tongti lenir, Sonia Gandhi ajuru candidate shimtsü atema o lemtepa liasü.

BJP lenir anati Sonia dang, tir shimtsü atema opposition danga asüngdangtsüji Ato kilonser, Narendra Modi aser party-i melunger, ta metetdaksü.

Kasa senden nung Congress lenirtem- Ghulam Nabi Azad aser Mallikarjun Kharge nata densema liasü.

Osang ajanga ashiba agi, tenüing kar benokdanga dang nungibo inyakyim metetdaksübaji tajungba ta BJP-i bilemer.

Tamalen Tir ana- A P J Kalam aser Pratibha Patil na

meshim danga sorkar tashi nung aliba party-i opposition party tem den tama tongtepa liasü.

Iba senden tembangba sülen osangbenertem den jembidang Congress lenir, Azad-i, "Tir election atema sorkari tenüing ka danga mebenok, ajisiüka opposition nungi candidate karbo ali asü? ta asüngdang," ta metetdaksü.

Tir election atema jembitsü aser tangatettep kati arutsü asoshi tanep Singh aser Naidu na Sonia Gandhi alidak, 10 Janpath residence-i oa liasü.

Iba sendenji minute 30 shi amen.

Sonia Gandhi-i tentetba, sub-group nung züngsemtem (opposition lenir 10) Azad indang Parliament chamber nung senden ka amenba sülen anogo ana lir BJP lenirtemi Congress tongti, Sonia ajuruogo.



New Delhi, June 16, 2017: Hokolbarannü New Delhi nung South Korea Special Envoy, Jeong Dong-chae-i Ato kilonser, Narendra Modi ajuruba noksa nung angur.

June 21 nū PM Modi den minister 74-i yimti 74 nung Yoga aitsü

New Delhi, June 16 (Agencies): International Yoga Day anogomung, June 21, 2017 nū Ato kilonser, Narendra Modi den Union Minister 74-i linük nung yimti 74 nung shilem agitsü, ta osang ka ajanga metetdaksü.

Modi-i aniba National Democratic Alliance (NDA) sorkari taruba International Yoga Day atema sentong tulu ayongzüka lir.

Ministry of Ayurveda, Yoga and Naturopathy, Unani, Siddha and Homoeopathy (AYUSH)-i linük aser alima nung International Yoga Day takok ngua mungtetsü atema mapang talangka nungi inyaka arudar.

Yoga Day nū Ato kilonseri Uttar Pradesh yimtiba, Lucknow nung shilem agitsü, iba sentong nungji AYUSH Minister, Shripad Naik-a adentsü.


Bharatiya Janata Party (BJP) Tir, Amit Shah-ia

Ahmedabad yimti nung Yoga aitsü. Union Home Minister Rajnath Singh-i Himachal Pradesh, Sujapur Tihra sentong nung aser Information and Broadcasting Minister, M. Venkaiah Naidu-i Delhi nung ayongba yoga sentong nung shilem agitsü.

Ano Union Minister tem- Ravi Shankar Prasad, Nitin Gadkari, J. P. Nadda, Smriti Irani, Dharmendra Pradhan aser Piyush Goyal nungeri Patna, Nagpur, Chandigarh, Kochi, Bhubaneswar aser Visakhapatnam yimtitem nung shilem agitsü.

AYUSH Ministry-i iba sentong takok ngua katettsü nükjiding nung tanga linüktem nung Ambassadors aser Embassy tem dangia shidi züluogo.

International Yoga Day ya 2015 küm tenzüka mapang nungi tenzüka küm shia June 21 nū mongyonga arudar.



June 16, 2017 nū Udupi, Karnataka nung Indian Institute of Gem & Jewellery (IIGJ) amenoktsü atema lung azüngtsüba sentong nung Minister of State for Commerce & Industry (Independent Charge), Nirmala Sitharaman-i milen tsüklokba noksa nung angur. Kasa noksa nungsa Udupi nungi MP, Shobha Karandlaje, GJEPC Chairman, Praveen Shankar aser tanga ketdangsertema angur.

London mi lendong nung asür 30 jungogo, aika ano mangur



London, June 16 : Grenfell Tower mi lendong ajurur aliba nisungtem Britain chubatsü, Queen Elizabeth II-i 2017, June 16 nü semdangba mapang tangokba noksa nung angur.

London, June 16 (Agencies): London nung aliba Grenfell Tower mi lendong nung asür nisung 30 jangjaogo aser anu aika mangu bushidar, ta police ajanga Hokulbarnü ashi.

"Iba mi lendong nung asür nisung 30 jungogo aser ano alitsü südi," ta Police tanishir, Stuart Cundy-i osangbener dang Grenfell Tower anasha ashi.

Mongulbar ayatirm nung iba mi jangru tenzüker anogo ana buba nung storey 24 amentepa süa aliba ki nung mi junga remseptetogo, ta police lenir-isa ashi.

Iba kitsük-kirong lendong nung asür nisung kar bo mejangjatetsü südi, ta police temi ashir. Nisung ka bo mozü ki nung asü aser iba lendong nung yirur nisung 24 mozü ki nung anepaluba mapang aser item rongnung parnok 12 kanga mejungi yirur lir, ta Cundy-isa ashi.

Firefighter temi drone aser azü amshia ki telung nung bushisüngdang asüba mapang lir aser ki temalen aliba floor kar bo anu metongteti lir, ta ashir.

Mi lendong nungi kümzüüksü asoshi sentong junga meyangu, ta iba tesem nung alirtemi aija jashitepba mapang ka nung England chubatsür, Queen Elizabeth II aser lar semchir Prince William-nati iba tesem nung aliba community centre ka semdangogo.

Obendanger kati aniba telok kati iba lendong bushisüngdang asütsü sorkar-i totuyuba agütsüogo aser iba bushisüngdang tekeraba nung tembangtsü nüburtemi ajungshir.

"Iba tesem nung Grenfell Tower mesük aliba ki tem reprangdangtsü totuyuba agütsüogo aser talisa ki tejen süaka junga angutsü aser densa mapang balala nung kümzüka alitsü asoshi inokba oset tem reprangdangtsü," ta Communities & Local Government Minister, Sajid Javid-i osangbener dang ashi.

"Iba amala ki nung aliba nisungtem kümzüka ayutsü asoshi asenoki akokba tashi inyaktsüla: aser aji ki ya junga yanglushitsü mesüra ki tasen kar bushitsü tim lir," ta paisa shisem.

Britain Ato Kelonser, Theresa May-i iba lendong nung yariteper den ajurua jembitsü asoshi Brehostibarnü iba tesemi aruba mapang iba ki nung alir majuruba asoshi nüburtemi aitsür.

Lai mozüki nung yirur alirtem bo Hokulbarnü ajuruogo.

Iba tower nung apartment 120 aliba nung mi kanga kera jangrua aoba ashoshi nüburtem molungjang nung tasüngdangba balala arur. 1974 küm yangluba Grenfell Tower temalen 'cladding' inokba ajanga iba mi kanga kera-a jangru, ta osang kar ajanga ashir. Iba ki ya sen million \$11 indoka taoba küm yanglushir liasü.

Iba 'cladding' telung nung plastic aliba ajanga mi ya kanga kera asemshia ao südi, ta osang ajanga ashir. Iba oset ya amshia France, United Arab Emirates aser Australia nung ki süa aliba nung taoba mapang iba ama kasa lendong ajurua lir, ta osang ajanga ashir.

Mi lendong nungi kümzüüksü mechi US nung aliba ki tulu nung iba oset amshiba nokdanga lir, ta osang ka ajanga ashir.

Turkey mitkartemi tanur ka densema nisung pongu khaset

Rome, June 16 (Agencies): Syria lisobur tem Turkey arrtsü alema aotsü merangba mapang Turkey Border Guard temi arishi küm 1 tain tetsür ka densema nisung pongu khaset, ta Syria nung ketdangser kati ashi.

Northwest Idlib province nung aliba Hatia nung iba lendong adalokba mapang tebur

ana yiru, ta Britain nung aliba Syrian Observatory for Human Rights ajanga ashi. Iba telok-i sangdongba osang ya Syria nung aliba doctor tem aser par telok züngsemtemi agütsüba osang nung ajemdaker sangdongba lir.

Sorkar busemer aser parnok anemer tsüngta raraba mapang

Idlib nung nüburtem aika taküm samaogo.

Iba ama densa ka nung ozüngi memelai arrtsü alema aitsü merangba nisungtem aika Turkey Border Guard temi khasetogo aser aika dak züka merenshiogo, ta Amnesty International aser Human Right Watch ajanga ashir.



Jeju, June 16: 2017, June 16 anogo Jeju, South Korea nung 2buba Asian Infrastructure Investment Bank (AIIB) senden tenzüka mapang South Korean tir, Jae-in aser AIIB tir, Jin Liqun-na densema tangokba telok noksa ka angur.

America nunger temulung meilatsü: Donald Trump

Washington, June 16 (Agencies): Democracy anema inyakba mapa, amokmerenba mesüra amakba ajanga America nunger temulung meilatsü, ta US tir Donald Trump-i ashi.

Republican baseball practice nung nisung aika yirutsüba aser teyirur rongnung Congress züngsem ka adenba sülen Trump-i telongjem alitsü atema ayimoktsü.

Yashi Congressional Baseball Game matongdang Trump-i video osang ka sangdongba nung iba sentong nung yariteper ajak dang pelaba metetdaksü.

"Taonung asaya ya khenyongi balaka ta nenok ajaki meteta lir. Ajak dak alia, taonung asayaba ajanga nenoki asen democracy anema amokmerenba, ozüng alema inyakbatem ajang temulung ila mebilemer ta alima dang sayur.

Asaya maneni aotsü" ta Trump-i ashi.

"Iba mapang ni Congressman Steve Scalise aser par kibong ajunga dangi asenok temeim aser sarasadem abener" ta paisa shisem.

Trump-isa Capitol Police nungi Special agents Crystal Griner aser David na dang pelaba metetdaksü aser tenüngsang agütsü.

Indian-American Congressman Ami Bera iba asaya nung aden aser pai ashiba agi, congressional baseball game ya America nunger sobaliba ka lir.

"Iba asaya nung party anaprongi meputep toktsür aser America nunger ama külemi longjemmer aser tenla atema asayar. Asen linük nung tensa mejungi kümaka, iba aonung ya asenok longjemba mapang tongtipang ka lir" ta Bera-isa shisem.

Kabul nung suicide bomb apok, nisung pezü asü



Kabul, June 16: 2017, June 16 anogo Kabul nung aliba Muslim nunger tekülem ki ka nung bomb apokba anasa police kati ali nung azü melanga aliba reprangdang tangokba noksa nung angur.

Kabul, June 16 (Agencies): Afghanistan yimtiba Kabul nung aliba Shiite nunger tekülem ki ka anasa pei sasa temang nung bomb inoker pokdaktsüba lendong ka Brehostibarnü nikongdang adalokba mapang nisung pezü asü. Muslim nunger temeshi ita, Ramadan mapang nung Afghan yimtiba nung iba ama lendong aika adaloka arudagi.

Al-Zahra tekülem ki telung nung nüburtem aika sentepa aliba mapang, pei sasa temang nung bomb inoker pokdaktsür nisungtem ya iba ki telungi aitsü merang, saka police temi

nokdangba ajanga iba tenlaki indang sorochiokba takdang-i oa iba bomb pokdaktsü, aser iba lendong nung yirur nisung ti liasü.

"Kiralongrar temi West Kabul nung aliba Al-Zahra tekülem ki amak. Iba lendong nung civilian asem aser police ka asü aser nisung ti yiru," ta Kabul nung sorkar ketdangser, Najib Danish-i ashi.

Iba lendong agütsüba ya telok katia tenüng agia mali saka Kabul nung Shiite nunger aliba iba tesem nung Islamic State telungpur temi aiben lendong agüja arudagi.

China nung bomb lendong agütsür nisung jangjaogo

Beijing, June 16 (Agencies): China nunger kindergarten ka nung bomb pokdaktsüba lendong nung nisung ti tashi asüba ya arishi küm 22 tain, Xu mapa lir, ta police ajanga jangjaogo aser pa iba lendong nung asü, ta ashir.

Police temi Xu aliba ki nungi bomb yangluba osettem ngutet.

Jiangsu indang eastern province nung aliba Fengxian tesem nung tanurtem kaket reju tembanger kidangi aoba mapang iba lendong ya adalok.

Xu ya temang nung timtem kar liasü aser pa ya school junga

mezüngtet saka mapa inyaka liasü, ta police temi ashi. Iba bomb lendong nung nisung 60 dak tali yiru aser parnok rongnungi nisung ti bo kanga mejungi yirur lir.

Iba lendong agütsüasang ya security camera aser lendong adalokdak tesem nungi DNA bendenba ajanga putet, ta police temi ashir.

Xu ya tekolok meshidakba ajanga school junga mezüngteti anen, ta kasa osang ajanga sa ashir. Iba lendong adalokba tesem nung nisung ana asü aser mozüki nung trok asü.

E-Tender Notice No. IREPS/Agg/13 of 2017 Dtd: 13-06-2017

Works tenders through "E"
Tsünglangen tejangja agüja aliba mapatem inyaktü asoshi India Tir tenüng nung Tendering system meshir: Mapa inyaktüba indang : Provision of track maintenance work for the improvement of track in the section of SSEIP/WayISCE between HBN-MBO under ADEN, JID; Tender Value: t96,76,916/-;

Earnest Money : f 1,93,5401-; Mapa renemtsüba mapang : 8 (Eight)Months; Tender document jenjang : 35,0001-

Tender shibangtsüba anogo & mapang : 15.00 hrs. on 24-07-2017. Tender lapoktsüba anogo aser mapang : 15.00 hrs. on 25-07-2017. Temetetsü :

(1) Tekalen agüja aliba tender document den nungdak temetetsü ajak 24-07-2017 anogo 15 hrs tashi website <http://www.ireps.gov.in> nung angutsü. Tenderer agütsürtemi parnok meyong etender-ji iba website nung dang yoktsüla.

(2) Etendering dak alaka tanga inyakyim ajanga agütsüba tender magizütsü. Iba mapa inyaktü atema contractor-temi IREPS website nung class III Digital signature dena register süa ayutsüla.

(3) Rate page nung Rates agütsüba aser digitally sign asüba dang agizütsü. Tanga financial telok meyong rate bener arua tender agütsürtemi enoktsüra magizütsü.

(4) Tender agütsürtemi documents agütsüba ajakl nung digitally sign asütsüla.

(5) Tender atema sen agütsübaji Demand Draft, Bankers cheque, Cash Deposit receipt manual / offline ajanga agütsübatem magizütsü. Bidder-temi senji Net Banking, debit / credit etc. IREPS Portal ajanga agütsütsüla. Iba atema Fixed deposit Receipt (FDR) ji EMD ama IREPS (e-tender portal) nung adentsü purtem nungi magizütsü.

(6) Tender shibangtsü atema ango aser mapang telatet ka alitsü. Kodakirnakaser, iba anogoji anisüngzüka amongtsüsa anogo ajurura, tananü kasa mapang nung tender-ji shibangtsü. (7) Timtem kar ajurura, IREPS meyong website nung help desk ajanga teyari meshitsü akok.

(8) Iba mapa nung "Any Civil Engineering work and P.Way work" agia alirtem ajak temsü akümtsü. Divisional Railway Manager(Works), Lumding



ELITE HEALTHCARE TRAINING INSTITUTE
Dimapur - 797112, Nagaland
ADMISSION GOING ON

Courses offered	Eligibility	Duration
FHW (Female Health Worker) ANM	10 th Passed	2 Years
DHAI/ Nursing Assistant	8 th Passed	1 Year

CENTRE-I
Dhobinallah Culvert, Near ICICI Bank. M.No: 9856125245/ 9615694009

CENTRE-II
4th Mile Near Agri Expo Junction M.No: 8974507931/ 9862639134

Office Timing: 9 AM - 1 PM (Monday to Friday)

National Institute of Homoeopathy
(An autonomous organisation under the Ministry of AYUSH, Govt of India)
Block GE, Sector 111, Salt Lake, Kolkata 700 106
Website: www.nih.nic.in

ADMISSION NOTICE FOR ADMISSION TO 5^{1/2} YEARS BHWS DEGREE COURSE

For detailed advertisement the candidates may follow Employment News and NIH website: "www.nih.nie.in" Last date of application 12/07/2017 (Wednesday) upto 5.00PM davn 17209/11/0002/1718

OFFICE OF THE VILLAGE COUNCIL LAKHUNI
P.O Mangkolemba, BPO - Alongtaki, Dist - Mokochung, Nagaland

METETDAKTSÜR

To **Shri. Noksangluba, Lakhuni**
26th June 2016 nung na village council court Lakhuni nung 7:00 PM shitak nung arua report süang, tashi mangara sobaliba nung aliba ama inyaktü.

Sd/- **Mr. Tekatemsü Langu, Secretary, Village Council Lakhuni.**

Sd/- **Mr. Lanuyanger Langu, Chairman, Village Council Lakhuni.**

Kidang mapa inyakerkem... (TAPAK 1 NUNGI...)

"Kidang ki mapa inyaktürtem ya kibong nung yariteper ka dangbo masü saka pa mesüra laji taa agia inyaker ka lir, anungji pa mesüra la temeten aser akümüji kümzüka ayutsüla," ta paisa metetdaksü.

Iba sentong nung MLA Dr Neikiesalie Nicky Kire-ia kidang ki mapa inyakerkem mezüngmeshia mamshitsüla saka meima amshitsüla ta metetdaksü. Iba sentong nung Labour Commissioner, Nungshiyanger Aier-i "Domestic labour and the labour law" ta asüba onük nung jembidang, Union Ministry of Labour & Employment-i kidang ki mapa inyakerkem teyari angutsüsa oziung latetsü atema Task Force ka shima lir ta metetdaksü. Ano külen, ki mapa inyakerkem mapa nung mapang shitak amshia nendaka inyaktü aser ochishia alitsü atema Labour Commissioner-isa ajungshia liasü.

MASADANGTET TEMEIM OJALA
ASÜR TIARANGLA LEMTUR

18-10-1938 17-06-2016

Na onok nungi pilar küm ka rentetta aodang ne temeim mamateter.
- Kinüngbo, Chirnur aser Kinüngertem

MAMATETER
ASÜR O. MEREINLA (Salulamang) (June 17)
Küm ana abensaba bilemteter

Temeim jala na iba akümüli nung meliaka na onok nükla nung teti lir, ne mapa tajung onoki teti bilemteta sarasademer.
- Tsürabur, Oya, Odi & Apokla

SANGDONGER

Khensa yimtak Leoba kidong nungi Imnalepsa semchisemnurtem arok meyong ali nungi, Talinungsang aser Maputemjen tenati, Changkochayong alu aser Langpatetsüba alu ana ya, ozü tebou semchir tatatainer aser kinünger dang miima yokadok nung, tanü June 16, 2017 nungi Talinungsang aser Maputemjen Imnalepsa tebou semchir kimunglumung kecha nunga metendaksü ta lemtetba sangdonger.

Iba alu anaji shirnoki alia lir ozü tebou semchirtemi teka aitsü memelar.

1. Pangerangshi (Tatatainer) Meküli Village
2. Tinumeren (Tatatainer) Meküli Village

Nagaland nung election timi agitsü ... (TAPAK 1 NUNGI...)

Ano, yimten, lokti aser arogo nung lenirtemisa Election department dang vote agütsüba anogo nung proxy vote enokba aser tashiyim amshiba nokdangtsü asoshi polling station ajak nung vote agütsüba mapang piyong cctv agi noksa agia anidaksüla ta metetdaksü. Iba senden nungsa political party nung lenirtem dang Ruling nung dang adentsü mebilemi nübortem tenzüksü bilema yimsü asütsü aser ano nübortem danga Tsüngrem akümtsübuba aser nübortem meimba lenir tajung bushia adokdaksütsü atema ajungshitepa jembia liasü. Iba senden sentong tenzüka jembidang, electoral merüktetsü asoshi department-i software tasen amshia inyaktü tenzükgoko ta Chief Electoral Officer (Officiating) Wb.N.Moa Aieri metetdaksü. Ano, tanüsa Election department-i "election watch mobile Web" ka tenzükgoko. Iba web ya ajanga nübortem election maparen indang tementetnüba reprangtsü akoktsü. Ano, election maparen dak sendakba nung osang agitepa nungdakba mapatem inyaktü asoshi district aser sub-division ajak nung 'control room' kaka lapoktsü ta CEO-isa metetdaksü.



Dimapur district kübok Molvom yimtak center government-i Swachh Bharat, Beti Bachao Beti Padhao, PMJDY amala sentongtem ayongzüka agiba asoshi tenüngsang agüja jajaba noksa nung angur. Kohima, June 16, 2017.

TENÜNGSANG AGÜTSÜR

Ungma Imlang, Imertetba Semchirtem rongnungi Mr & Mrs. Imitangyang-er jabaso Dr. Chungpongsuwa-i Sorkar tenzükgoko wadang nung Deputy Director tongtetba asoshi oboula semchirtemi ne nem konang tetushi agütsür. Asen tiatsür Tsüngremi ner wadang ajak nung moajangma.

Sd/- **Limasungit Tatar Imertetba Semchir Ungma Imlang**

Sd/- **I. Imkong Pongen Secretary Imertetba Semchir Ungma Imlang.**

VIGILANCE COMMISSION NAGALAND : KOHIMA NOTIFICATION
// Dated 14th June 2017.

NO.E.VIG-2312010 :: The result of interview for 1 (one) post of L.D.A.-cum-Computer Assistant (for Konyak tribe) under the State Vigilance Commission is hereby declared on 14/06/17. The name and Roll number of the successful candidate in order of merit is given below:-

Sl. No.	Name	Roll Number
1.	Mr. Y.C. Joseph	17

Waiting List

Sl. No.	Name	Roll Number
1.	Mr. Maoba W. Konyak	118

The waiting list shall be valid for 6 (six) months from date of declaration of result.

Sd/- **SEHJANG DOUNGEL, Secretary, Vigilance Commission.**

Indonesia Open nung HS Prannoy aser Kidambi Srikanth-na semi final tongogo



New Delhi, June 16 (Agencies): India nung badminton asayar HS Prannoy aser Kidambi Srikanth-na tebur kija asaya nung Hokulbarnü Indonesia Super Series Premier indang semi-final-i iogo.

Arishi küm 24 tain, Srikanth-i Chinese Taipei nung World

No. 19, Tzu Wei Wang madak 21-15, 21-14 agi takok ngua iba asayamong semi-final tongtetogo. Iba asayamong nung India nung Prannoy-i Olympic champion, Chen Long madak 21-18, 16-21, 21-19 agi takok angu. Srikanth aser Wang tsüingta asayaba nung tanü

asaya akokba ajanga Srikanth-i Wang madak anaben akoker lir. Iba asayamong mezüngbuba round nung Srikanth-i Lin Dan tsükdaktsü.

Prannoy aser World No. 8, Chen Long tsüingta aseben asayaba nung Prannoy-i khen danga koka maliasü, saka tanü asaya nung Prannoy-i koktet.

Prannoy ya yirur mapang talangka asaya kata nunga shilem magiteti aruba sülen pa indang visa nung timtem adok aser iba sülen anu pa indang khu sama, saka tanü pai kanga junga asayateta semi-final tongtet.

Brehostibarnü asayaba nung World No. 25, Prannoy-i World No. 3, Lee Chong Wei madak 21-10, 21-8 agi takok ngua liasü aser kasa anogo nung World No. 22, Srikanth-i Denmark nung World No. 9, Jan O Jorgensen madak 21-15, 20-22, 21-6 agi takok ngua liasü.

India-i 2032 Olympics ayongtsüa akok: IOA Tir, Ramachandran

Chennai, June 16 (Agencies): Hokolbarnü Indian Olympic Association (IOC) Tir, N Ramachandran-i, 2032 Olympics ayonga akatsü atema India-i tenüing agütsütsü atema sorkari melungogo, ta metetdaktsü.

Tamil Nadu Olympic Association (TNOA) Tir shimba sülen Chennai nung osangbenertem den jembidang pai, "2032 küm linük nung Olympics ayonga akatsü atema sorkari melungogo. Onoki ajak agizükdaktsütsü nüngdaker," ta ashi.

Iba inyakim ya tebenja lir, ta shia Ramachandran-i, "IOA-i temepishiba onük ka renema ibaji agizüksü atema sorkar nem agütsütsüla. Iba sülen sorkari telangzüba tajung agütsütsüla. Tang aliba sorkar kijai masü saka Opposition lenir-ia ibaji agizüksü," ta paisa ashi.

"Iba den külemi shimtetba yimti indang state Chief Minister



N Ramachandran (File)

asor opposition lenir-ia ibaji agizüksüla," ta pai ashi.

"Iba inyakim ya tajemba agi küm 6 nungi 8 tashi agitsü. Ibaji melamela inyaktettsü. Tanü jenjang asadanga, iba nungji US sen million 12 shi indoktsü, iba nungjagi shilem 50 shi saru aser IOC senotsü nungi angutsü," ta paisa ashi.

"India ama linük tulu ka atemabo tanüingba senji aikabo masü. Küm 8 nung sen million

6 angutsüji tasakbo masütsü," ta paisa metetdaktsü.

Ramachandran-i ashiba agi, pai IOA Tir aser TN Olympic Association tekolak menden abenba nungiji kecha timtem mali.

Iba dak sendakba nung pai, "(Asür) B Sivanthi Adityan IOA aser TNOA naprong Tir inyak. Iba nungji tenokdanga mali," ta ashi.

TNOA election taküm May 27 nü agi, ajisüaka High Court tetuyuba nung ajemdaker election osang sota yua liasü.

Tanüingba office ketdangpurtemji Vice-presidents: Ishari K Ganesh, S Vasudevan, Solai M Raja, M Ramasubramani, T R Narayanaswamy, D V Seetharama Rao; General Secretary: J M Fernando aser Treasurer: K Rajendiran nung lir. Iba dak alia joint secretaries ana aser executive committee züngsem 9 lir.

Messi-i Manchester City nung madentsüa akok: Soriano



Ferran Soriano

Lionel Messi

London, June 16 (Agencies): Manchester City chief executive, Ferran Soriano-i, Barcelona superstar, Lionel Messi-i English Premier League side nung madentsüa akok, ta metetdaktsü.

Osangbener den jembidang

taoba mapang Barcelona tatong Tir, Soriano-i, "Nunga. Yamaji masütsü amai ni bilemer," ta metetdaktsü.

"Ni Messi kanga junga meteta lir. Pa aser par kibongji kü tembar tajung lir. Pa Barcelona den tezüngzüketp

agir südi. Pa taküm piyong pa Barcelona nung adener," ta paisa ashi.

2003 aser 2008 küm tsüingda Soriano Barcelona nung inyaka liasü, aser sangküm Messi contract tembangba sülen pai Nou Camp (Barcelona headquarters) medoktsütsüa akok, ta ashi.

Yaküm Messi tesayur, Pep Guardiola Manchester club nung adenba mapang nungi tenzüka Messi Manchester City nung adentsü atema olulu jembia arur.

Tan ita tatemlen Messi arishi küm 30 ajungtsü, aser pai Barcelona den ano tezüngzüketp tasen ka yanglutsü atema inyakba osang lir.

India nung sobaliba saisapongtem atema inyaktsü: PM Modi

New Delhi, June 16 (Agencies): Brihostibarnü Ato Kilonser, Narendra Modi-i, India longjemdaktsüba nung saisapong ajanga tongtibang shilem agir, anungji par sorkari linük tesem ajaklen Kabaddi ama sobaliba saisapongtem national level jenjangi ajungkettsü atema meranga inyaker, ta ametetdaktsü.

Kerala, Kozhikode district kübok Kinalur yimtak P.T. Usha's USHA School of Athletics nung synthetic track semzüksüba sentong nung jembidang Ato Kilonseri, "Asen linük ya sobaliba temeyoktep aika aliba nung takar lir, kong oshi 100,oshioben 1.600, chiyungba yimya balala, abensüoshi aser benjung balala aika lir. Saisapong ajanga asenok longjemdaktsüba nung tongtibang shilem ka agir," ta ashi.

Modi-i Delhi nungi video conferencing ajanga iba sentong nung jembia liasü.

Pai-sa P.T. Usha-i India nung saisapong ajungkettsüba atema tentüngsang agüja, iba track tasenba ajanga training agirtem nem tanü putu den apert facilities agütsütsü, ta metetdaktsü.

"India nung saisapong nung P.T. Usha ya milen sayur ka liasü. Lai taküm nung tayongzükbaka aika ajangshiogo, aser la Olympics final-i ia tera agi dang medal mangu. India nung saisapong putiotsü nung nisung kari dang la ama jenjang alangzükteta lir," ta Modi-isa ashi.

Usha-i nükjidong yur rangloker inyakba ajanga jenjang tajung alangzüktet aser lai training agütsüba saisapongertemia International jenjang nung mera ajemokdar, ta shisem.

Confederation Cup nung referee tem longbangba FIFA-i repringtsü

Zurich, June 16 (Agencies): 'Play fair' sentong dak ajemdaker Russia nung Confederation Cup asayamong mapang asayartemi referee longbangba azioktsü asoshi sentong yanglutsü, ta football asaya nung temaba telok, FIFA ajanga Brehostibarnü metetdaktsü.

Football asaya tebur junga asayatetsü aser iba asaya noksa tajungba kümdaktsütsü nükjidong nung football asaya indang temzüng aser ozüing yangluba telok, IFAB den külemi lungjemer iba sentong tasenba ya Brehostibarnü saya.

Asayar yimya majungba ajanga football ya danga asaya dang tamajungba, ta aikati züngshir.

Football asayaba mapang referee aser asaya ketdangsertem-i ashiba aser lemtetba anema nokdaka asayartemi parnok lungbangba aser asayartemi mapang indokba ya teti angur.

Referee tem dak asayartemi teka sangshiba aser asayaba tesem nungi aridokba video aika YouTube nung angur.

"Football asayar yimya tajungba kümdaktsütsü aser asaya nung shilem agir akhum tsübuba (talisa asaya ketdangsertem) amala yimya melenshütsü asoshi referee, asayar, coach aser football sabur ajaungai molunga lir. Asayaba mapang talangba kümdaktsütsü aser asaya nung rarapangsen melie asayadaktsütsü ya football indang nükjidong tulutiba asütsüla," ta IFAB technical director, David Elleray-i ashi.

Confederation Cup mapang asayar temi asaya ketdangsertem lungbangba mit adokba yimyatem kanga junga repringtsü, ta FIFA indang technical director, Marco van Basten-ia ashi.

Confederation Cup 2017 ya Russia nung June 17 nungi July 2 tashi asayatsü lir.

2018 election nung... (TAPAK 1 NUNGI...)

"NPF CEC-i sorkar dang ULBs atema Advisory Committees tentetsü ashibaji magizüker, kechiyong taoba Advisory teloktemi Centre sorkar nungi aruba senotsü aser sarutem auyazüka agiogo. Advisory committee temi terenlok mapa inyakba kecha mangur aser parnokji public indang tebilemba magii Party-i dang shim" ta Therie-isa metetdaktsü.

Congress-i Advisory committee tem anema nokdaktsü. ULBs ketdangtsüa repringtsü atema administrators tajungtem lir aser parnokji mapa tajungba inyaktsü, ta paisa ashi.

NPF CEC-isa Centre dang achiajemba nung tenokdanga magütsütsü indang ashiba atema Therie-isa ashiba agi, NPF-i 'nashi tepsetba nokdanga' indang jembitsü tsübur kechiyong parnokji state nung BJP sorkar mejashidaktsünür.

1929 Naga Hills

Memorandum nung Naga nung tamangba yimsü, sobaliba, yimyatsüya aser achiajem balaka asübayong India kübok madentsü aser nüjiso meshia zülua lir. Tanü tashi asenok timtema arur, saka NPF sorkari Centre telemtetba anema ola adoktsü tsübura, Nagaland nung alirtem tenüing nung parnokji ketdangtsüba menden toktsütsüla. Ibaji asü nungdang India sorkari Naga nung agizüksü, ta NPCC tirisa ashi.

Nagaland Police nung retired ASP, MKR Pillai indang rongsen bushisüngdangbaji CBI nem agütsütsüla ta shia, Therie-i "Angh P B Acharya-i iba onük atema Nagaland state sorkar dangi shidi mezülü, Centre sorkar dangi ang zülutsüla aser CBI nem bushisüngdang südaktsütsü atema asüngdangtsüla. Ano, police department-ia iba onük indang osang tejangja metetdaktsütsüla" ta shisem.

BILEMDANGANG

"Nai repringba ji tongtibang masü, nai anguba ji tongtibang".